

江夏縣志卷六

人物志十一

忠臣 孝子 政績 文苑 行誼 武功 隱 論 列女 節孝節義附

魯論微子一篇所以志人物也。第自殷有三仁。至伶官去國。皆紀衰世之事。豈人才獨不見於盛世與。終之曰無求備於一人。所以有八士之盛。此見生才固難。用才尤不易也。尚志節者不必有功名。立功名者不必兼文行。言語政事各有專長。大人天民不同分量。班史人物表高下差謬。張氏譏之。與其博而不精。不若簡而能核。著其大節。雖百世可傳也。

忠臣

晉

江夏縣志

卷六

人物

一

張光字景武以牙門將伐吳有功。歷遷北地都尉。時氏羌叛。太守戰歿。光以百餘兵戍馬蘭山。羌圍之百餘日。屢出奇兵擊破之。梁王彤表光擢新平守。荊州刺史劉宏嘗稱光為南楚之秀。及陳敏作亂。與江夏太守陶侃設伏。敗敏將錢端於長岐。宏因表光勳。遷材官將軍。梁州刺史先是秦州流人鄧定等為盜。因計賂巴西太守張燕。密結李雄。進逼漢中。光至魏興。乃結諸郡守共謀。進取杜正沖。具言張燕受賂阻兵。光怒。斬之。以徇。綏撫荒殘。百姓悅服。鎮漢中。時逆賊王如餘黨李運等自襄陽入漢中。光遣參軍晉邈拒之。邈受賂反。復欺光。賊遂大勝。光嬰城固守。自夏迄冬。憤激成疾。佐吏勸光退。

據魏興光按劍曰吾受國厚恩不能剪除寇賊今得自死便如登仙何得退還也聲絕而卒二子昺少辟大宰掾多才略有父風州人推權領州事與賊戰歿

晉史張光江夏鍾武人

唐

李磻字景望鄜孫拭之子大中末進士累遷戶部郎中分司東都嘗劾奏內史郝景全不法事黃巢陷洛磻挾尚書八印定河陽時留守劉允章為賊脅遣人索印磻不與允章悟不臣賊昭宗素重磻後召為同中書門下平章事李茂貞等上言其非帝不得已罷為太子少師時茂貞與王行瑜擁兵關下列磻罪殺之都亭驛行瑜誅詔復爵謚曰文磻好學家有

江夏縣志

卷六

人物

二

書萬卷世號李書樓子沆字東濟亦負俊才俱遇害

宋

張叔夜官樞密院勤王死難白溝河妻蔡氏媳王氏俱投井死長子伯奮次子仲熊抗志自刎三子棟死太白山下張叔夏叔夜弟食中大夫祿宋亡為金所獲投黃河七日遇救復甦扶小宗欲為恢復之舉後聞叔夜及難赴水死

元

聶炳字韞夫泰定

通志作元統初

四年試大別山賦登進士第初授

承事郎同知昌平州事轉寶慶路推官會峒獠寇邊湖廣行省右丞禿赤統兵討之屯武岡以炳攝分自理問官悍卒多

掠民爲俘炳言於禿赤釋其無驗者數千人至正十二年遷知荆門州淮漢賊起荆州失守炳募土兵七萬復其城又與四川行省平章咬住復江陵旣而蘄黃安陸賊復熾合攻荆州炳率孤軍晝夜血戰援絕城陷被執口罵不絕賊斷舌執齒支解之

馮三湖廣省公使不知書寇陷湖廣阜隸悉起爲盜邀三辭曰賊名惡我等豈可爲眾將殺之三唾罵賊縛諸十字木昇之行剗肉並斷喉妻亦投江死

通志

明

吳裕中字幼益一字磊石號敬菴其先自萬載徙江夏父紀

江夏縣志

卷六

人物

三

字璧山生四子裕中其季也五歲授句讀一日持兩梨歸奉父母父摩其頂曰孝子裕中應聲曰忠臣紀深奇之嘗有胡僧識之曰此于忠肅後身也由進士令順德綜理周密屏絕陋規又置石關修海門嚴武備獎士類廉能大著攝篆新會邑有猪頭山多盜裕中力請監司建署移官設哨幢二往來以壯聲援民利賴之兩舉卓異入爲江西道御史巡視中城次輔丁紹軾內黨客魏外怙崔田舉朝無敢言者裕中夜設香案昭告二祖列宗伸紙具疏風旋滅燭者三裕中叱之續火脫稿奏上閣票擬不究紹軾喉璫矯旨奪削廷杖百適裕中之某侍郎所同兩諫垣兩庶常陪堂主喪事緹騎至四座

失色裕中從容曰昨具小疏此必爲我抵午門拜杖血飛如注肉糜骨碎猶聞誦天子聖明不絕稍甦語所知曰杖亦君恩但小疏四才達其一諸君繕後三疏次第封奏可告無罪於先皇又語侍者母氏遠隔數千里豈知兒今夕爲國死乎遂絕年四十一歲時丙寅正月初二日也諫者走報紹軾時紹軾方手茶甌忽墮地碎驚怖失措偃身連呼饒我不干我事左右驚問曰適見吳御史來越二日暴死裕中旣卒楚中宦京都者莫敢往視惟廣濟孝廉金之純順德進士朱可貞經紀喪事以歸懷宗卽位追贈太僕寺卿恩褒三代廕一子入監讀書予祭葬賜諡忠烈祀鄉賢子四窾承廕入太學窾

江夏縣志

卷六

人物

四

瑤俱廩生琮任邱知縣

吳思溫字江黃萬厯乙卯鄉舉任均州學正鑄祭器祀

先聖陞雲南順州牧苗蠻犯順撫循有方厯任廣西布政致仕歸值獻賊薄城率兵守保安門抗節而死蘆蓆蔽尸數月不變國朝乾隆四十一年 賜謚節愍

熊廷弼字非百一字芝岡身長七尺餘少髯有膂力能左右射年二十九丁酉領鄉解戊戌成進士授保定推官官評吏治軍實民畧皆應手立辦終任計所出及改矜疑者三百餘人詳平反錄攝府篆幾三年諸爲民苦者罔不釐正作徵收則例由票比限起解銷錠諸式詳巡撫汪應蛟通行六府永

爲民便詳署事錄薦天下理官第一名爲工部主事尋授御史朝論有文武才特命巡按遼東撫輯多方又築河東邊城七百里墩堡數百創常平倉十七所積穀百萬斛時邊圉無事弼策其後必有大變章數十上皆留中辛亥督學南畿拔孤寒請託不行以嚴於馭士爲御史金養喬劾歸家居會郡連年水乃謁當事請江咸嘉蒲四縣築隄二百餘里民始安業公賦無紕已未遼東經略楊鎬喪師杜松劉綎馬麟等三路俱敗沒鐵嶺開原奉集瀋陽城堡盡燼誠如弼論神宗用御史楊鶴言詔起弼爲大理丞兼河南道御史往遼東宣慰軍民隨授兵部侍郎兼僉都御史代鎬經略遼東賜尙方

劍比至遼陽斬陣逃遊擊劉遇節士捷設壇躬祭撫靖開鐵死事軍民時遼陽新破僅存空城弼至修築要害分兵防守招集流亡閱數月儼然重鎮初諸邊將領多尅扣月餉入已而遼左爲甚弼斬遊擊陳倫以徇三軍股慄自開鐵連陷人民奔竄牛馬一空軍無寸鐵弼爲備牛三百餘頭車二萬餘輛晝夜轉輸軍中始有糧草增造大礮數千創礮二三萬制雙輪戰車五千餘輛他如甲仗弓矢山集軍中始有器械遼賴以安者凡十五月泰昌元年九月光宗崩熹宗卽位御史馮三元張修德等交章論弼恐僨遼事弼遂具疏求去先是戶科給事姚宗文服闋赴補而吏部題請率數年不下因假

招徠西部名求弼代請弼不從由是恚弼後宗文得吏科差往閱遼軍馬力詆弼短又喉黨交攻有旨命弼回籍聽勘是時弼所奏疏與中樞台省不協咸欲以此時殺弼賴科臣朱童蒙往勘回奏力言弼無罪天啓元年得辭任歸以袁應泰代之四閱月而遼陽亡應泰自刎關門大震上忽思曰假令熊廷弼在豈壞至此再起弼田間進爲兵部尙書經略遼東賜勅劍蟒王金帛副將以下先斬後奏又爲斥三元修德等降調外任宗文革職爲民嚴旨切責弼至京陛辭賜宴都城外五府部院掌印官陪餞旌旂祖帳蔽天本兵張鶴鳴意有所屬弼拍案曰今日不得言邊事鶴鳴由此銜之乃恣意撫

遼王化貞以分其權化貞疏請戰兵部是化貞議弼言遼東再壞兵力未集議主守由是經撫不合二年廷議賜化貞尙方劍便宜行事故化貞主戰益力是時廷弼以五千人守右屯而化貞十三萬兵駐廣甯先鋒孫得功化貞心腹將也戰敗入振武走入廣甯城密諭軍民降封府庫以待而化貞不知及城陷化貞時臥方起倉皇乘馬而逃僅從數十人至閭陽遇廷弼自右屯引兵至化貞見廷弼大哭廷弼笑曰君疏言六萬人蕩平遼陽今竟如何君不受欺召募胡騎不撤廣甯兵於振平當無今日乃囑其宰駐勿動而自星馳入關以安軍民詎廷弼入而化貞亦入河西陷矣事聞化貞逮問廷

弼回籍聽勘法司會審具獄詞謂廷弼與化貞同失封疆並坐斬時御史謝文錦江秉謙等先後具疏言廷弼不宜與化貞同科且云廷弼不幸與兵部相忤展布無由化貞又不幸與兵部相比言聽計從當斬本部張鶴鳴以謝天下疏入不聽繫獄二年適魏璫柄政副都御史楊漣疏璫二十四罪而媚璫者謂稿出廷弼手御史梁夢環希璫旨奏廷弼侵盜軍資十七萬又起姚宗文巡撫湖廣追贓籍其家產姻族皆為破家江夏知縣王爾玉嚴於追比索廷弼諸子將搃之長子兆珪自刎死崇禎元年詔赦廷弼贓二年大學士韓爌工部主事徐爾一為訟冤次子兆璧赴闕乞父首領骸骨歸葬詔

江夏縣志卷六

人物

許之謚襄愍至

國朝乾隆四十八年

高宗純皇帝念熊廷弼忠於前明

特召見其元孫熊泗先授襄陽縣學訓導六年俸滿引

見奉

旨以縣丞用

貢其志字以達天啟甲子舉人知四川屏山縣舊作雲山尋署富

順以骨鯁歸崇禎癸未獻賊陷城武昌志將其家二十餘口

闔門焚死赴鐵佛寺自縊長子庠生之球三子之琅並與難

惟妻姚氏攜次子之珮僕貢新逃居三城里

國朝乾隆四十一年 賜諡節愍

朱蘊鏡字希周楚宗藩也博聞強記親賢樂善懷宗初詔宗室有文武全才者許照品換俸授職鏡以介拂王意初議首舉不果直指汪公聞其賢特疏未下獻賊破鏡同弟蘊鈞罵賊死子盛滴中崇禎己卯副榜次聖裔貢士出嗣陳姓

艾棐字以輔號天游萬厯庚子舉人辛丑明通第一爲行唐學博教士有法陞固原州尋遷成都同知逾年致仕歸成都人擁馬首扳號與固原一轍歸與諸耆碩續香山洛社之盛所著詩經正宗兵火散失棐故廬距城百里癸未之亂羣勸公徙居棐正色謝之城破日棐語其妻王氏曰止留一子以

江夏縣志

卷六

人物

八

承宗祀言畢與妻王氏子宗濂孫文炳俱投井死

賀逢聖字克由一字對揚少食貧力學風度端凝爲諸生與熊廷弼齊名而不相能同受知於督學熊尙文或問二生優劣尙文曰熊生干將莫耶也賀生夏瑚商璉也岸幘陵轢摧陷廓清賀不如熊他日柱天維地休休有容熊不如賀萬厯丁酉熊領楚解入謁尙文舉手賀且曰賀子雖未售益當大貴無疑越六年癸卯舉於鄉再上春官不第以親老就應城教諭父陽亭公春秋高不欲就養乃留妻危氏奉菽水攜僕自隨至則併志讀書日與諸生以道義相切劘嘗坐明倫堂見先聖於屏門頃有持聖肖至者宛如所見益以大儒自

期嘗曰吾敷歷清華平章軍國無一事足報大官者惟寒毳
七載實心實行庶幾免素餐譏耳丙辰登進士第二人授編
修天啟閒爲洗馬時熊廷弼已再起經略遼東廣甯之敗祖
王撫者咸歸獄熊同鄉官梅之煥等出揭直之意逢聖有異
同逢聖慨然曰逢聖與經略幼同社長同朝第以其過於自
用不能臨事而懼每相規切便覺不合此何時安敢小嫌介
介不以明卽具草上之是時魏客竊柄舉朝羶附逢聖獨不
假辭色璫思羅致之故爲好語諷以建立生祠事逢聖曰此
地方官事非某所得知璫又曰聞上梁文出先生手逢聖正
色曰作文借銜陋習耳忠賢佛然去翌日矯旨削其籍莊烈

江夏縣志

卷六

人物

九

帝卽位六年詔起爲南祭酒尋丁艱歸服闋入都上喜慰補
少詹遷禮部侍郎九年以禮部尙書兼東閣大學士加太子
太保改文淵閣十一年以首輔專恣樹援致政歸帝思之不
置十四年再召入閣帝待之不如延儒明年累章乞休乃予
告宴餞便殿賜金及坐蟒感激大哭伏地不能起帝亦泃瀾
動容焉癸未賊張獻忠連陷蕪黃逼江夏逢聖督守南門一
武勝門寇攻城急逢聖衣冠啟楚藩請發藏鏹犒軍不應五月
壬戌晦城陷賊令曰必勿犯賀相公逢聖叱曰我朝廷大臣
豈爲賊苟活耶遂北面五叩頭載家人以其舫艤出墩子湖
鑿其舫艤溺死從死者妻危氏子覲明子婦曾氏陳氏孫三

人次子光明守八分山閩難來及僕萱等凡二十餘人惟
孫士聰士廉存八月城復索其尸不得歲杪水涸始出凡六
閱月貌如生事聞帝命禮官優卹未及行福王時贈少傅諡
文忠祭葬廕子如制入祀鄉賢本明史本傳參採舊志
朱華趙字德心明崇陽郡藩七代孫慷慨任俠力能扛鼎崇
禎末寇逼鄰境於屋後掘二池及城受圍集妻子池旁拔劍
急呼曰我與賊誓不兩立城亡汝輩當死此少濡忍惟此劍
耳已而城破妻子俱赴池死趙率家丁巷戰殺賊三十餘人
勢不支伏劍死

朱恭敬楚宗也賊陷省城偕關外居民生縛數十賊被戕

江夏縣志

卷六

人物

十

孫鵬舉字天孫一字何知為諸生受知學使熊石門董思伯
以明經為新化學博著新說書直指特薦遷渭源令丁艱歸
復補松陽多惠政解組後值獻賊攻城與賀逢聖商堅壁計
城陷罵賊不屈遂遇害一門赴水死者十餘人有臥雪圖徽
猷閣詩文行世

國朝乾隆四十一年 賜諡烈愍祀鄉賢

張鳴錦字養時明末指揮千戶獻賊破城被執不屈舉家三
十餘口死之

國朝乾隆四十一年 賜諡節愍

何應軫字天經崇禎乙亥拔貢廷試欽取監元入詞林告假

歸閉戶著書獻賊破城執之不屈死子啟佑黃州府庠生孫

大學生工醫

謝澹培字應侯天啟甲子舉人任知縣歸博學能文著述繁富獻賊陷會城執之不屈死

明睿字作聖邑廩生力學安貧名節自勵獻賊薄城趣造木

主自題明苦節明生之位語人曰吾讀書明理一旦引筆寫

順民二字不如死城破妻陳氏先赴井詹繼之子女皆相繼

入後淘井得九尸里人稱之曰明井

李成名字次峯隱居教授獻逆破會城聞其名強以行抗節

不屈賊縛致市曹罵不絕口斷手齧身而死以上四人

江夏縣志卷六

人物

十一

國朝乾隆四十一年 予祀忠義祠

呂希肩明昭藩護衛也魁偉有膂力王委巡藩屬內外重地

獻賊薄城盾願負王繼出王不從城破入宮尋王不獲至端

履門遇賊入手刃數賊乃自刎

朱盛濃字楊亭明通山郡藩荷逕子以換授例官池州牧隨

永明入桂林為總督侍郎大兵破平樂及潯州桂林危甚盛

濃走靈州五年大兵破靈州闔門自焚死

沈宥字似仲歲貢生少宰惟炳次子寓省城包頭堤獻逆之

亂宥分守南城上儲衛戰守策不應歸哭曰大事去矣命弟

宜寅入京侍親寬率諸姪歸鄉守墓已誓與城生死城陷被

執不屈妻劉氏子岐英岐贊環哭罵賊被殺老幼無一免者
陳靖之由歲薦授太昌令介節自守罷歸無寸椽擔石獻賊
陷城慷慨罵賊死之

朱英燦號復禮楚東安郡藩五世孫說禮敦詩禮賢下士有

河閒東平風萬歷四十年舉賢良方正授宗正崇禎九年遇

覃恩賜坊額曰賢行可嘉建忠孝門內府第前襲一子管理

府事獻賊陷鄂燦率子華壘繩城去削髮為僧止孝感李家

菴甲申之變絕粟七日振衣北拜自縊死

國朝康熙甲戌次孫蘊鈺扶櫬歸葬靈泉風火山祖寢

婁貴宸字君淑通城王府儀賓有膽智不畏強禦獻賊寇楚

江夏縣志卷六

人物

三

宸率鄉勇數百人敗之次日賊大隊至被圍賓陽門外鄉勇

皆散宸獨橫槊奮呼斬賊數級被擒賊壯其英勇百計誘從

執節不屈大罵投濠死後子孫蕃衍京兆玠是其姪也

宸嫡孫

熊兆貞字善符廷弼族子也以歲薦授平江訓導立義館置

學田遷饒州安仁興利除弊詳安仁縣志晉工部主事以廷

弼被逮力請歸田獻賊陷武昌遁修賢里錦山不食數日死

朱蘊羅知四川藍田縣殉節諸臣錄作官蒲江知縣舊志作藍田縣歸值獻逆陷

城闔家殉難

國朝乾隆四十一年賜 諡烈愍

熊兆琮字叔敬襄愍第三子弱冠補弟子員爲文雄奇博太
獻賊逼城執矛捍禦城陷被執奪刃殺賊賊怒齧之

陳一房字天駟舌耕贍親童試受知提學蔡公獻逆將破城
以手刺血徧室內書無求生以害仁有殺身以成仁二語及
城陷房夫妻子女用大繩束腰拜別父母曰兒不能全孝矣
俱投燧子湖父母亦相隨死焉

郭金藩字价維邑庠生性磊落與人交尙意氣獻逆之變爲
賊所執罵不絕口被刃死

王師文任萊州通判歸以獻賊陷城不屈死

汪澤長邑庠生以獻賊陷城死難以上二人見楚會存書

江夏縣志

卷六

人物

十三

王時化萬曆乙酉舉人崇禎中知四川昭化縣丁丑十月李
自成陷城不屈死之以上陳志

劉士适號南宮生而穎異博通經史爲文浩瀚有奇氣年十
二督學首拔入庠獻逆薄城楚王下令勅諸生禦之錄适爲
隊長督兵守文昌門城陷衣冠向王宮拜日生力竭矣遂偕
妻徐氏死之

劉邦屏武昌衛世職因辦漕河軍務殉節

國朝

尹大用善騎射能挽六鈞弓中己亥武舉第二補督標把總
乾隆六十年楚南苗叛從征爲前驅遇賊於冷風均鏖賊三

晝夜歿於陣

田啟華字龍光癸卯武舉丁未進士補山東武守備與兄啟謨敦友愛嘉慶二年教匪作亂由楚竄蜀奉調往征至儀隴馬鞍山力戰死

彭國藩戊申武舉第一補千總虎項猿臂多力善射教匪之亂隨征至花果園奮勇殺賊陷陣死事定與尹田同附祀昭

忠祠

安徽布政使謚勤壯劉公裕鈐字見甫江夏人道光癸未進士由禮部郎官出守四川夔州時海內承平商賈輻輳夔州關榷貨稅無虛日上供國課下助本省公用而脂膏之潤亦

江夏縣志

卷六

人物

十四

頗足以買田宅貽子孫或仿范文正公立義莊或儲穀以備凶荒或多行善事以周郵鄉里則子孫食報行且無窮而公方銳志立功名不暇爲後日計由建昌道洊擢安徽布政使時武昌已經賊陷公家破去弗顧單騎之官入廬州蓋安慶未復行省移置廬郡徧地皆豺虎人不免望而卻步公獨叱馭而前可謂壯矣孤城岌岌固守數十晝夜其勤又何如哉迨援兵四集而羣帥怯懦無能解圍者公與巡撫江公同日殉難

贈布政使署江南六合縣知縣謚壯勇溫公紹原字北屏江夏人讀書尚氣節初以法家言佐人治州郡旣而慨然曰文

夫當自立功業有所表見於世烏能齷齪長依人作客哉因入貲爲鹽官尋改江南知縣咸豐初元檄權六合縣事時廣西之亂甫作天下承平久人諱言兵公獨急治城垣並講求保甲團練之法入莫喻其意至三年正月城工告竣而賊氛已徧江甯六合與江甯僅隔一江賊旣陷江甯連陷鎮江揚州而六合岌岌將不可保公悉才智與之敵初禦之於龍池繼敗之於南關斬馘甚眾賊掠沿江諸堡復於要路掘品字坑埋地雷火礮置梅花樁於港汊以斷賊徑又別募水勇掉小舟泗水與之上下賊無如何久乃爲之語曰鐵鑄六合賊初謀由六合夾攻甘泉山大帥營旣屢不得志乃築壘於九

江夏縣志

卷六

人物

五

洲扼江甯通廬鳳之路結木障長數十丈上亦築壘穴其旁置礮順流以竄擾下游眾曰事不在六合可勿問公曰大局壞一隅能獨保乎四年甲寅九月焚賊障於八卦洲十月會官兵攻九洲破其壘是役也公實首事而大帥不上其功公弗介意也後克江甯非斷九洲之接濟不爲功故賊必力爭我軍旣得而復屢失末以重兵守之賊始窮方賊之熾也南北兩路大帥皆無功惟公時有克捷故擢升知府升道加鹽運使銜而

朝廷知其能俾守六合如故先後凡六年旁州郡失陷殆盡而公始終無懈志然力亦竭矣八年戊午九月賊以全力先破

各鄉團使絕外援後穴地實火藥攻城陷公遇害夫人王氏子輔材殉焉事聞

詔加布政使銜

子謚優卹立祠諭祭葬如禮嗚呼昔張許之守睢陽以一城障江淮唐史稱其有社稷功今公孤守六年雖不至於殺妾烹僮然亦去羅雀掘鼠不遠矣使當日守土者悉能如公何至土崩瓦解使賊得志哉至今江南人思之不置功罪歷歷可指誠不可以成敗論也

贈道銜貴州候補知州彭汝璋字貢甫江夏人幼隨父官雲南習聞吏事咸豐初以知州權貴州鎮遠縣事勤於其職有

江夏縣志

卷六

人物

六

廉能聲調署古州廳同知未卽去而黃平州苗叛巡撫檄就近與陳令毓書往分撫之黃平壤接鎮遠民皆知公苗亦聽命故所至三十餘砦皆帖然服已歲事矣巖門衛者在萬山中苗砦環之舊制屯衛錯處所以控馭諸苗日久屯田多廢衛不設兵故苗受漢民之欺往往思叛岩門其最險也陳公旣入其中困不得出以書給彭往助彭不之疑也旣至知其詐從者請亟行猶可出城中民環跪痛哭曰公去民皆死矣公愛鎮遠民獨不愛黃平民乎攀臥不得行因顧從者曰吾爲若守此土城存亡當共之耳發書請兵十七上而不報一字城陷死之從者三十人無一先去者嗚乎黔苗之敢於戕

官自茲始也其時若得一旅之師可以立定其亂而疆吏既始不加察釀成厲階復諱疾忌醫輕以良牧投之虎穴而不顧是誠何心哉至上十七書而不報當日擁節鉞者直土木形骸而已又奚貴焉

河南降調知縣吳公承芳字蘭溪江夏人道光癸酉科舉人歷任河南唐縣等處後於淮甯任內因公降調回籍平日砥行立名故官無失政既歸鄉里尤以端品力學爲後進儀型城未陷之先公率子姪助官兵守城與巡撫爭所言皆不行因自捐銀米助餉不憚勞瘁夙夜在公城破全家遇害身受多傷其狀甚烈嗚乎武昌初次城陷死者數十萬人紳民之

江夏縣志

卷六

人物

七

全家殉難者不可勝紀當時大吏類皆以惜費誤事而又不令紳富贖資以犒戰士如公者僅中人產猶指銀千兩米七百石使有力者盡傾其囊大吏又何必吝賞哉官私徒積金錢盡以貽賊若唯恐稍有短絀者是誠大不可解也

孝子

漢

黃香字文疆九歲失母思慕憔悴人稱至孝父舉孝廉爲郡五官貧無奴僕香躬自勤苦盡心供養暑扇牀枕寒以身溫席年十二博學通經史能文章太守劉護聞而召之初除郎中章帝元和元年詔詣東觀讀所未見書帝顧諸王曰此所

謂天下無雙江夏黃童者也。以言政拜尚書郎。數陳得失。累遷尚書令。出守東郡。上疏自陳。仍留尚書令。增秩二千石。賜錢三十萬。管樞機。東平清河奏妖言。卿仲遠等所連及千人。香料別據。奏全活甚眾。郡國疑罪。務求輕科。曉習邊事。均量軍政。皆得事宜。帝數加恩賞。疾病存問。賜醫藥。在位多所薦達。安帝延光元年。遷魏郡太守。郡舊有田園。與人分種收穀。數千斛。香悉以賦入課。令耕種。時被水。年饑。乃分俸祿。及所得賞賜。班贍貧者。於是富家各出義穀。助官烹貸。荒民獲全。後以水潦事免。卒於家。祀鄉賢。所著賦牋奏書。令凡五篇。

按後漢書以香爲江夏安陸人。通志因之。並云香瓊墓皆在安陸縣。故郭張二志不入。潘志載之。亦未詳所據。陳志

江夏縣志

卷六

人物

六

引明太僕張璞黃公鄉記云。漢各臣傳載黃瓊。自敘年譜。里居在江夏五谷嶺。又漢唐古誌瓊墓在青石邑瓊祖墓在黃陵山東南。今黃陵山。地有五谷城。青石店。鄉老云。今之五谷城。卽黃公鄉。今蔡氏莊。卽黃公墓。以爲江夏卽今沙羨之據。歷漢至明二千餘年。土人之言。不必盡實。然今永豐里黃柏山下。亦傳有琬墓。均歷歷。若可考據者。則不得墨守漢書。竟謂江夏之必非沙羨也。

三國

孟宗字恭武。性至孝。母年老病篤。冬月思筍。時地凍無從得。筍宗入竹林哀泣。頃出數莖。作羹供母。遂愈。仕吳爲望江雷池監魚官。每得時物。必以寄母。不敢先食。自能結網取魚。作鮓寄母。母還之日。汝爲魚官。以鮓寄我。非避嫌也。後仕至司空祀鄉賢。今武昌左衛猶傳是孟宗故宅。孟城白鶴山下舊

有哭竹亭。楚國先賢傳謂宗母嗜筍，及母亡，冬節將至，筍尚未出，宗入林哀嘆，而筍出。與本傳互異，要其孝感則一也。

按楚紀孟宗江夏郡鄢縣人。又孟嘉傳嘉字萬年江夏鄢人。曾祖父宗吳司空祖父揖廬陵太守。按河南南羅山縣漢鄢地也。漢晉江夏郡置雲夢北鄢縣屬之。今邑乃沙羨縣亦屬江夏郡。三國時分置武昌郡。今邑改屬武昌。隔在漢江東南。去鄢本遠。宋人稱城東靈竹院為宗故宅。紹興間立祠以祀。故一統志注為今邑人。羅山不載焉。意宗遠祖隸鄢後流寓沙羨。因家於此。故其事蹟歷歷可考。紀傳言鄢者蓋即先世稱之也。宗果非斯產其遠孫荆湖制置使孟珙不得從而誣之。則宗例得歸之。今邑嘉傳又稱宗葬武昌陽新縣子孫家焉。袁宏孟處士陋銘亦曰陽新人。按陽新今武昌興國州地。與武昌接壤。宗歿葬此。後人隨墓家居。故謂陽新人。武昌縣志載宗為武昌縣人。多因地近陽新。後代復有遷於彼者。遂引傳訛鄢為鄂也。應城陳士元謂孝感北連羅山。疑宗為孝感人。更無所據。餘詳孟宗宅故。

江夏縣志 卷六

人物

九

晉

孟陋字少孤。孟嘉之弟。清操絕倫。喪母毀瘠。不飲酒食肉者十餘年。親族謂之曰：毀性無嗣。更為不孝。然後從吉。簡文帝親政。命為參軍。不起。或謂桓温陋學為儒。宗宜引在府。温嘆曰：會稽王尚不能屈。非敢擬議也。陋博學。以文籍自娛。長於三禮。註論語行於世。

唐

李廓字建侯。邕從孫。至性純孝。母黃氏羸老。病久數年。牀蓐涕唾腥穢。朝夕躬親。曲事服勤。至死。孝聞天下。肅宗旌之。顏其室曰：蓼莪。初舉進士。授秘書正字。李懷光辟為監察御史。

懷光叛陷賊中陰與故相高郢密奏賊軍虛實及攻取勢事
泄懷光囚之及懷光敗入爲吏部員外郎徐州張建封卒兵
亂拜鄜宣慰使鄜持節抵其軍召將士指陳禍福釋監軍使
使復位凶黨不敢犯還遷吏部郎中順宗時轉刑部尙書兼
御史大夫諸道鹽鐵轉運使憲宗五年出爲淮南節度政嚴
事理府稟充積及王師征淮夷鄆寇李師道表裏相援鄆發
楚壽等州兵二萬餘分壓賊境日費不煩有司時帝以兵興
國用不足命鹽鐵副使陳異馳驛江淮諭諸道輸貨助軍鄆
籍府庫留一歲儲餘盡納於朝廷諸道效之故王師無乏吐
突承瓘監淮南軍引爲相徵拜門下侍郎同平章事鄆恥由

江夏縣志

卷六

人物

二十

宦倖進引疾以太子少傅致仕諡曰簡祀鄉賢子拭仕歷鳳
翔節度使以秘書監卒

舊志云鄆子柱拭按唐書無柱拭作拭今從之 曹憲傳
稱江夏李善杜少陵有哀秘書監江夏李邕詩舊志傳修
靜寺爲北海故宅李白題寺詩有我家北海語邕子暄避
難靈泉山下後爲中書舍人暄子鄆以孝聞本靈泉志善
邕暄鄆四世之墓皆在九峯山靈泉今
後裔猶居永豐里唐史志之江都誤矣

李沈平章之後事親以至孝稱

郭孝子逸其名

宋

黃觀象性至孝居父母喪哀毀盡禮廬墓六年墓側產芝詔
賜粟帛蠲徭役旌之

明

李夢龍幼孤貧習醫母病禱於神夢神示醫名延之母飲其劑曰果良醫吾病去過半中丞徐聞之名問知未娶給銀十兩付江夏令爲擇配旌曰純孝格天後龍病龍子之茂百計救愈獻逆變龍母謝氏自經死賊入門見匾額如林識爲兩代孝子釋之

李之茂事母郭氏至孝母亡甫殮適獻逆陷城舉家避去茂獨寢苦殯側賊至詰其不避曰母殯在不忍捨愿同死所耳賊曰此孝子不可戕也誌燾於門爲衛而去鄰人多潛匿其室今猶額其所居巷爲孝子巷在正覺寺側

江夏縣志

卷六

人物

三

吳承命字君秩明諸生性至孝母疾呼天請代尋愈闕三年始卒發壙得古石額曰永言

朱英煖字賓桃楚藩諸孫嘗築學堂與同邑賀陽亭黃陂黃武臬武濱互相師友學尙敦修不貴冥悟父卒廬墓三年兩臺疏其行誼神宗嘉之拜爲宗學大宗正

陳孝子逸其名傳爲江夏諸生冬夏恒著麻衣每肩擔一載木主刻母氏像一載竹器盛飲食浪遊城市嘗與市上嬰兒爲伍凡有邀之者必向木主前擲筭遇吉喜動顏色卽與人談忠孝節義事娓娓不倦否則痛哭不食其迹若狂而至性過人

潘廷桂字貞茂爲郡諸生幼出遊每得果餌卽以養親九歲時母病侍湯藥顓天請代母愈遂終身茹素成化三年以歲薦授南昌府經歷其父就養卒於署桂奉柩歸遇風鄱陽湖舟盡覆桂度不免以索繫棺於身忽飄至一洲得免比葬廬墓三年知府秦夔詳請提學薛綱旌其閭曰純孝格天

周壘字廷用母陳氏卒廬墓三年有文豹馴於墓側人以爲孝感所致又捐資建白洋橋輸粟賑饑有司以事聞旌表其閭賜以品服

按明史孝義傳並稱傳實周壘均未另立專傳舊志缺載但無事蹟可攷附注於此

馮天祿爲馮炳養子事父孝父病焚香告天割脅骨盡出飼

江夏縣志

卷六

人物

三

之病稍愈父病凡三年遺穢牀簣手爲捧拾無難色後過道士授方曰持此可療惡疾試之輒愈一日持藥囊入城門未啟枕囊而臥門啟他人誤持藥囊去天祿得所遺囊則金也候之三日不至偶過藩司前聞人失官錢被誣天祿懼然曰得金者我也還之封識宛然鄉人稱爲馮孝子

張岐鳳字號泉黃岡陽邏人補江夏庠生博學敦修父母歿廬墓六載曉夕悲號直指按部聞之賜官湖一曲旌其孝嘗有羣虎夜入其徑盤旋卻顧如相慰山下忽有流泉湧激聲如呼號里人因稱號泉先生所製自傷歌及名流題識成帙學使陽羨蔣序之

蕭廷滿金口人父早逝母周氏病革籲天請代及母死既葬絕不茹葷邑令顏文選造廬賜之粟不受旌曰廉孝

熊兆珪字元敬邑庠生明大司馬廷弼長子弼下獄珪走京師理薪水弼既被害魏璫使索珪珪徒步還里對母哭失聲曰父死兒不得獨生但未獲死所無何魏璫用御史梁夢環疏追贖十七萬二千兩諭楚鎮巡下廷弼諸子獄珪就逮曰吾父卽戇激安所得贖私十七萬乃舉田園器用圖書刀劍錄報御史臺御史劉徽疏再上覆贖二百萬珪遂閉獄戶書兩紙手授其僕汝士曰一以報吾母一以示縣官吾得死所矣遂引刀自裁三日屍始出面目如生祀鄉賢

江夏縣志

卷六

人物

三

朱盛球潘志作錄楚藩宗室幼卽知祈神以療親病後親歿泣血三年未嘗見齒

桂文瀚字嗣宗楚府儀賓過目成誦年十二入府庠楚藩延爲世孫師盡捐館穀設祠堂置義田癸未獻賊陷城賊執其父瀚亦佯出就執給若不相識者父羸弱不能行瀚身被重傷負出免害後絕意仕進惟以讀書談道種竹澆花爲務

朱蘊鏹字澗字楚藩宗室六齡失怙事母至孝母當六十稱觴有白鳩白鵲繞庭飛鳴良久而去人謂節孝所感初艱於嗣母爲買一妾聞其夫失官金坐獄鬻之以償遣還更贈以資終身不置妾媵後連舉二子

張其廉字介菴穎異工文親歿廬墓三年事繼母不啻所生
閭里稱其醇篤

張道中

張珏

明孝子逸其名

張郁云右三人之孝
皆曠世不相見者也

國朝

岳凌霄字會雲由明生員承武穆祀康熙十一年呈請清復
祀產禮祀得以勿替幼遭明寇母被刃未絕霄願身代賊義
釋之母陳氏節烈載黃梅縣志

江夏縣志

卷六

人物

五

楊于崑字五美一字恬菴世居黃陂隨父泮所徙江夏補弟
子員旋投筆登武科庚辰成進士授鎮筸鎮守備撫降洞苗
晉參將久之辭職性純孝嘗百計營救親疾教子兆傑極嚴
小拂意輒與以杖故兆傑亦以孝聞

又人
武功

楊兆傑字又仁一字鄂州五美之子事親以孝聞

艾自馨字德維丁酉鄉舉善事繼母人稱純孝

楊宗震字四知邑庠生性至孝獻賊屠城震負母陳氏出爲
賊所執懇以身代賊感其孝釋之夜負行五十餘里得脫失
父守廉亟返尋獲之復遇賊欲及其父震奮抱賊臂父得脫
震傷顛幾斃後闖賊屠戮徧野震奉父母匿山谷中拾菽麥

以進母卒結廬墓側三年未幾父又卒哀慟呼捨自是形神
憔悴鬱鬱以死士民請於當事旌其門曰孝心誠篤

劉定遠節婦劉胡氏嗣子母病危定遠禱天愿以身代母疾
旋瘳里族顏其堂曰貞風啓孝雍正三年旌

郭炳以遺腹生因字遺生七歲能文十四補弟子員性至孝
母孫氏卒炳水漿不入口者累日安貧讀書著有郝京山九
經解摘謬經解源流論稿藏於家

路青雲字自達號澹菴邑廩生性孝友繼母遭賊亂投水死
青雲入水哭救不克怨慕終身待異母弟至老怡怡喜推解
以岐黃術活人甚眾舉鄉飲介貢年八十卒

江夏縣志

卷六

人物

五

孫日旋字敬亭父丕垣由休甯遷江夏日旋中順天丁酉武
舉性至孝四旬喪偶見父早鰥亦不娶父病祈以身代父歿
廬墓十餘年撫從弟遺孤如己出乙丑授松江千總遷太嵩
守備軍戶有少寡婦被誣欲自縊力爲白之丁賦缺額鬻產
代償又有客舟鬻女完逋解橐贖還解組歸年八十卒
楊之杰字來北邑廩生性至孝豫爲父裨歲漆藏之爲里究
竊去父亡求弗得誓求如前所藏方已頃忽有裨具自上流
抵岸居民分拾杰出多金以購與前無異咸稱孝感壬辰歲
歉售已產置米數千斛以賑鄉鄰子士文登進士
黃天佑字石人邑廩生父元至避賊失所天佑遍處偵訪晝

夜號泣如是者數十年早鰥不娶善事祖母

李士昌事孀母孝友愛諸弟由監生授吳縣丞催科撫字民咸德之

彭植字森之郡庠生性至孝遭兵亂失母號泣遍訪後遇於通山奉之歸有湯姓以孤兒三才相託植代撫得以成立

周懋德字克崇其先山海關人以叔父仲武官撫標中軍因家焉德三歲失怙事繼母克孝貧約自甘恂恂無所表見仲武子勲卒遺孤天章幼德力以保孤自任天章後任西城兵馬司副指揮

曾孔一字君唯性至孝父孝文山陽令早卒母雷氏病百方

江夏縣志

卷六

人物

三

醫治尋愈嘗質屋助友人葬資年九十一卒

吳學字伯幽名儒元俊長子少有聲郡守呂雯明首拔之卒困童子試著書自娛事元俊以孝聞元俊年八十學年六十皓首侍側恂恂如孺子著有驚豔集南游草服耕堂集藏於家

讓則欽字允恭郡諸生幼孤賴祖母撫之成立欽事之色養備至性慷慨好施排難解紛里黨稱之

吳思聰字景華博通經史家貧孝事孀母有田數頃悉以分諸兄弟由歲貢授石首縣教諭

熊承裔篤於天性年十六夏逆之變扶祖同父母出城遇賊

欲傷其祖求代不許奪及就死賊感釋之逃匿山谷祖與父俱病危禱以已代輒愈祖與父先後歿俱廬墓三年以貧館於官聞母曾氏病卽辭聘歸母目患翳障日舐七次逾月復明又患癱日吮數次旋愈乾隆三年 旌

劉宏勳郡武庠生早喪父母事祖母節婦梁孝養倍至清明侍省嘉魚祖墓江行遇風繩約祖母於背及舟覆挾兩脰版出沒狂濤中湧三里遇救獲免嘗奉命還遺金里人贈額曰清讓家風祖母病痢時尙未娶躬滌廁踰四閱月卒不起痛哭嘔血幾絕葬後廬墓三年有馴犬守廬乳雉來巢之異乾隆四年以順孫 旌

江夏縣志

卷六

人物

三

陳文炳字若采天性肫摯敦孝友父宗周早入邑庠攻苦成疾異人授方云必某山某草乃可治卽冒風雪走百里外求得服之積疴霍然壽逾八十歿後廬墓三年繼母患癱吮之盡毒病已愛異母弟妹悉愜其隱二弟天撫孤嫠益厚乾隆七年里人爲之請 旌

楊哲進士威之孫守備我經三子至性篤孝年十三喪父哀毀逾節後居母喪廬墓三年有餉遺贍之者卻不受乾隆十一年 旌

韓步青讀書砥行事親極孝父定周病步青齋四十九日禱祝北斗求以身代歿後守墓涕泣母左氏歿後慟極求其落

髮捧之哀號廬墓三年朝夕泣誦蓼莪聞者心惻乾隆二十四年旌

曹如鳳字子儀廩貢生肄業成均考授州同早孤事母色養承歡飲食衣服必親檢點偶恙卽衣不解帶老猶依依如嬰孩淡於仕進潛心理學著有曹劉合稿醒世集壽九十餘歲子文棻贈武德騎尉

岳克成字爾昌少孤事母以孝名母卒終身不御葷酒

歐以增少孤母蔣鞠之後蔣病羸增年十四朝夕哭不輟求名醫治症先是增祖母李及母蔣皆以孝義聞眾請給匾獎之

江夏縣志

卷六

人物

三

王敬天字牧伯少孤事母以孝聞傭書供甘旨母卒敬天年五十擗踊呼號如赤子臨葬抱棺長痛幾欲身殉廬墓三年無歸志里人火其廬爲勒其事於石

張宗邦字綏萬天性孝友父鼎臣郡庠生得疾宗邦親侍湯藥無效乃焚香泣禱愿以身代得名醫治之尋愈

汪知材邑庠生母王氏病篤醫云糞甘則危知材嘗之甘號泣祈天請代次日其妹小姑年甫十四再嘗之變苦拜求醫治醫感其誠治之不踰旬愈

段先達字鴻中號漸齋由廩貢中壬子鄉舉父追文邑增生未四十而鰥不再娶時先達方毀齒能先意承志私作哭母

詩父病痢穢濁必親滌衣不解帶者四月

程之班字文中力敦行誼以禮自範居父憂廬墓三年

黃琮字維瓚邑庠生以文行稱居父憂廬墓三年

劉安眾字恕己力學敦行父重器病百治罔效齋沐禱於宗
祠求以身代占得明夷之六二不藥起其從子以畧字元士
父安疆病亦如其占獲愈人皆謂其能誠

劉以明邑庠生少孤貧敦孝弟母患噎膈醫罔效日禱天求
代忽假寐夢人謂之曰爾母宜食某魚卽自館歸求之途中
忽飛鳥遺一魚拾歸奉母食之遂愈鄉里奇之以爲孝感

夏士友幼喪父業薙髮以養母唐氏天寒晨起炊熟蕪炭置

江夏縣志

卷六

人物

三

牀前奉母食如是者二十年年四十猶未有室邑某以出妾
贈之居半載與姑詬於室士友曰汝不能慰吾母安用汝爲
攜還某家後年餘士友卒母痛子亡而悲亡身老日夕慟哭
適山西張姓僦居於鄰聞之曰世固有孝子如若人而母不
得終養者哉詣其家匍匐母前願爲義子月供薪米奉以終
身張亦義士也

明德紹性純孝母病侍湯藥無頃刻離會病聞戚族趣應試
旣成進士以母老亟歸遇母病思得山藥遠屋悲啼沙盆中
忽產數枝人以爲誠感後令蒙城至今蒙民猶頌遺愛焉

馬學亮字輝宇有至性母瞽父病痿扶持飲食必躬親遺溺積穢皆自澣濯隆冬盛暑無間越六年父母始沒哀毀備至鬻恒產營葬具貧幾無立錫先是因親病究心岐黃術後遂食業焉

吳彪字覺軒邑庠生性純孝其親病百藥罔效陰爲割股和藥進之立愈

杜詩韻字友蓮號馥溪康熙庚午武舉庚辰進士父醕菴有義行詩韻幼慧性至孝嘗割股愈母疾選成山守備有儒將風凡修學宮葺城垣皆身任之地當海防請置戰艘備禦任滿以疾歸爲父營遷葬廬墓泣奠如初喪焉後此惟日與親

江夏縣志

卷六

人物

三

故遨遊賦詩自娛嘗纂錄古名將行軍秘要安邊戰守略以子昇官陝西都司加贈懷遠將軍

葉登仕父其秦以故株連戍西域時仕甫婚與仲兄庠生永清同往省視三年返歸益戚慟踰年復裹糧獨往泊至父已逝羈孤不能奔柩乃佃西域田稍獲餘卽奉父柩並父執李姓柩歸渡烏龍江遭風舟覆仕抱兩柩漂十餘里抵平岸而質斧已喪因停柩覓幫人質積貲得奔柩旋里時已越七載矣旣儲祭費建宗祠捐產開公塘鄉里咸稱孝義年六十四卒

饒肇昌號永溪幼攻讀有至性年四十餘妻亡不再娶父喪

母在飲食必白炊潔奉迨母九十四歲病卧牀褥涕唾腥穢皆躬親曲事維謹母沒食素二十餘年年九十二無病卒王和秀性至孝始爲父病素食數載父病篤割股和藥進獲瘳母病復割股二次及父母沒廬墓三年早晚必哭泣祭奠年五十卒

魏大年字鶴村乾隆己卯舉人天性純篤力學善解悟工書法舌耕養父母從遊者多所成就父病目大年吮其翳目復明與鄉黨交循謹和平人無忤者任應城教諭士林愛敬之魏台士性純孝母病劇醫藥罔效台陰割股以進旋愈

曹鴻鄴字書林江夏人性穎悟好學能文應童試有聲性情

江夏縣志

卷六

人物

三

篤事親從兄藹然孝弟遭兄喪繼失怙爲養母計棄舉業操竒贏家道以裕先世居南樓前徙而村居書林不忘先業復於南樓前構屋居焉弟鴻謨以軍功官江右疾卒聞之瞿然曰弟不幸亡矣母氏年幾大耋詎堪悲痛秘不使聞託云奉公遠赴滇南時代作家書持誦母前復裹寄俸金供甘旨戒家中人無得漏言獨處常有淚痕侍奉則強作歡笑如是者三年餘逮母氏壽終日竟不知也子二芳澤芳溢芳澤出繼伯氏禹川子亦二視之無異已子延師訓誨咸得成名因修葺祠塋勞瘁邁疾卒年五十有生平端方和藹好義樂施不備書書孝行之至大者

王成璐字廉普江夏人道光癸未進士由翰林改知縣初宰安徽南陵歷任桐城宣城升甯國府移貴州銅仁府再調貴陽所至皆有聲後遷雲南鹽法道從征貴州苗已奉

命擢授貴州布政使矣以大府議不合引疾去時軍事方棘信用非人旋以憂卒公歿之日愛其文者目爲才人知其政者嘆爲良吏卽事上交友忠告善道人皆識爲正人君子而不知公之內行尤爲篤摯也公兄弟二人父母愛憐少子故公之愛弟終其身不衰弟有私蓄數萬金玩好之物充牣於室而公自始仕以至罷官債負亦數萬在官出納悉以付弟不問也弟以殉財故闔門死於賊公撫孤姪如己子人或

江夏縣志

卷六

人物

三

議其弟者公未嘗有一言嗚乎世之稱孝子者必曰能事父母父母既往事親之事畢矣而猶曲體其心者誰平寡人有弟不能和協而使餬其口於四方鄭莊雖感頰考叔之言終不得爲孝子也若公者殆詩所謂不匱者矣

蕭存統江夏保安里人妻李氏夫婦皆善事其母統嘗謂其妻曰世爭事神以求福吾家有母卽吾家之神也吾與若日日敬事之卽厚福矣此外復何所求乎妻曰謹受教終其身不衰母年九十統年九十一妻年百歲子鉅鏗皆百歲人謂孝子之報云嗚乎世俗之衰也禱祀日興爭以金錢施僧道僕僕叩拜於土木之偶而生我者昊天罔極反視之漠然安

得孝子大聲疾呼撼天下之醉夢者而使之覺也修德獲福顯有明徵天殆故示寵異以勸世歟當時寂然無聞幾於湮沒而鉅鏹之叨承餘蔭並享高年先後獲邀

曠典若不溯其先德不幾重其末而輕其本乎是宜亟表而出之徐之榮依仁里人宗族稱孝子生有至性年十一而孤事嫡母與所生母皆能盡禮母疾病割股和藥而立愈因棄儒習醫著有痘疹定論眼科大成行世其未梓者尙數十卷云傳宗岐幼失怙事母以色養數十年如一日親沒獨居喪次及葬朝夕詣墓所問安涕泣三年無間里人稱之

蕭成坤性純篤父母早逝祖父母年老家貧無以爲娶祖母

江夏縣志

卷六

人物

三

卧疾穢衣溺器日親澣濯當時以順孫稱

陳錫才目不識丁以傭工養母母病不離左右親供湯藥劇則號泣焚禱願減已算以延親年母沒哀毀骨立至廢寢食

○ 改績

漢

黃瓊字世英魏郡太守香之子也隨父臺閣習見故事及居職練達官曹永建初徵拜議郎遷尙書令元嘉元年桓帝欲褒崇大將軍梁冀湖廣等稱宜比周公瓊獨建議比霍光鄧禹冀以爲恨遷司空會地動策免爲太僕永興元年遷司徒冀所託辟召一無所用冀誅拜瓊爲太尉舉奏州郡貪污至

死徒者十餘人尋以五侯擅權引疾不起卒贈車騎將軍謚忠侯

黃琬字子琰瓊之孫父早喪少辯慧建和元年日食太后詔問所食分數時瓊守魏郡難其對琬方七歲侍側曰何不言日食之餘如月之初卽以應詔司空盛允有疾瓊遣候之會江夏土蠻生事戲曰江夏大邦蠻多士少琬曰蠻夷猶夏責在司空允甚奇之稍長拜五官中郎將光祿勳陳蕃深相敬待顯用志士爲權富郎所中傷陷以朋黨蕃坐免官而琬亦罹禁網幾二十年光和末太尉楊賜薦之拜議郎擢青州刺史遷侍中歷太僕出補豫州牧值寇起琬討平之徵爲司徒

江夏縣志

卷六

人物

三

遷太尉後董卓秉政琬諫遷都曰大業既定豈宜妄動以虧四海之望卓怒之琬曰白公作亂居廬肯及崔杼弑君晏嬰不懼吾何憂竟坐免後拜光祿大夫及徙西都轉司隸校尉同司徒王允謀誅卓後卓將李傕郭汜破長安收琬下獄死

三國

費禕字文偉蜀後主時爲黃門侍郎丞相亮舉爲校尉使吳應機條答吳人不能屈還遷侍中亮北駐漢中請爲參軍司馬值軍師魏延與長史楊儀相惡禕諫諭分別終亮之世各盡延儀之用代蔣琬爲尙書令國方多事公務煩猥禕識悟過人每朝哺聽事日中接納賓客飲食博奕盡人之歡事亦

不廢延熙七年魏軍次興勢假禕節率眾往禦光祿大夫來
敏求共圍碁時羽檄交馳人馬擐甲禕與對局色無厭倦敏
曰向聊試君耳君信可人必能辦賊禕至敵果引退封成鄉
侯領益州刺史進開府十六年威首大會飲醉爲魏降人郭
循所害諡曰敬侯

通志以費文
偉爲江夏人

李通字文達與郡人陳恭共起兵朗陵殺周直攻破陳邵生
擒黃巾六帥吳霸降其屬建安初曹操拜振威中郎將屯汝
南西界及操與袁紹相拒官渡紹遣使誘以官爵通斬其使
後又擊破郡賊瞿恭等定淮汝之地封都亭侯拜汝南太守

卒諡剛侯子基襲爵

通志作江夏平春人
通祖就徙居於此

人物

江夏縣志

卷六

三五

晉

王偃令江安義陽蠻賊張昌橫熾江夏士庶應之惟偃與秀
才呂蕤不從昌以三公位徵之偃蕤密將宗室北奔汝南投
豫州刺史劉喬鄉人期思令李權常安令吳鳳孝廉吳暢
糾合善士得五百餘家追隨偃等不豫妖逆

晉史張
昌傳

李重字茂曾少孤好學有文辭性友愛弱冠爲始平王文學
上疏論九品官人之弊遷太子舍人轉尚書吏部郎務柳華
競不通私謁留心隱逸羣才畢舉拔用北海西郭湯瑯玕劉
珩燕國霍原馮翊吉謀等爲秘書郎以清尚見稱

見百
官志出爲

行討虜護軍平陽太守正身率下永康初趙王倫辟爲相國

左司馬以憂逼成病卒家貧宅狹無殯殮地詔於典客署營

喪追贈散騎常侍諡曰成子式官侍中晉史作江夏鍾武人

南齊

李珪字孔璋為尚書左丞時中外穀帛至賤珪議出上庫錢

五千萬及諸州錢皆令雜買從之後歲荒賴以賑救通志作江夏鍾武人

武人

唐

李邕字太和善之子本江夏人善父元哲徙居揚州江都少

知名既冠謁特進李嶠願一見秘書嶠薦直秘閣未幾辭去

嶠驚問奧篇隱帙了辨如響嶠及張廷珪並薦拜左拾遺會

江夏縣志卷六

人物

美

御史中丞宋璟奏張昌宗語不遜請付法司武后不應邕進

曰宋璟志安社稷非為身謀望可其奏武后色稍解既出或

謂邕造次邕曰不顛不狂其名不彰後術士鄭普思以妖妄

為中宗所信授秘書監邕復抗疏指斥詞甚直切明皇即位

拜殿中侍御史改戶部員外郎出為陳州刺史明皇東封邕

於陳州謁見屢獻詞賦稱旨張說忌其才以事下獄當死許

州人孔璋上書救之略曰陳州刺史李邕學成師範文堪經

國剛毅忠烈難不苟免往者張易之用權人畏其口而邕折

其角韋氏恃勢言出禍應而邕受其鋒是邕有大造於我邦

家也疏奏得減死貶遵化尉後從中官楊思勗討賊有功歷

括淄滑三州刺史上計京師後進不識京洛阡陌聚觀以爲
古人天寶初歷汲郡北海太守邕素性豪放不拘細行李林
甫惡其負才使氣因事矯殺之年七十初邕早擅才名雖謫
外中朝衣冠天下寺觀多齎金帛往求其文有文集七十卷
時號李北海代宗時贈秘書監祀鄉賢

宋

馮京字當世少雋邁不羣鄉舉禮部廷試皆第一時猶未娶
張堯佐負宮掖勢欲妻以女擁至家束以金帶曰上意京力
辭出守將作監丞通判荆南軍府事還直集賢院判吏部南
曹同修起居注吳充以論溫成皇后追冊事出知高郵京疏

江夏縣志

卷六

人物

一

充言是不當黜劉沆請並出京仁宗曰京何異但解起居注
旋復之試知制誥避婦父富弼當國嫌拜龍圖閣侍制知揚
州改江甯府以翰林侍讀學士召還復出知開封府數月不
詣丞相府韓琦以京爲傲弼使往見京曰公爲宰相從官不
妄造請乃爲公重非傲也出安撫陝西請城古渭通西羌唃
氏界木征官以斷夏人右臂除端明殿學士知太原府神宗
卽位復爲翰林學士改御史中丞王安石爲政京論其更張
失當安石指爲邪說請黜之帝以爲可用擢樞密副使進參
知政事又薦劉攽蘇軾掌外制會選人鄭俠上書薦京可相
呂惠卿因譖京與俠通罷知亳州未幾以資政殿學士知渭

州茂州夷叛徙知成都府蕃部何丹方寇雞綜關聞京兵至請降議者遂欲蕩其巢窟京請禁侵掠給稼器糧食使歸夷人喜受盟願世爲漢藩召京知樞密院以疾未至帝中夕呼左右語曰時夢馮京入朝甚慰人意乃賜京詔有渴想儀型不忘夢寐之語以觀文殿學士知河陽哲宗卽位拜保甯軍節度使知大名府改彰德范祖禹言京爲安石惠卿所傾中立不倚爲先帝稱且昭陵學士獨京一人存若付樞密必允公論時京老乃以爲中太一宮使兼侍講改宣徽南院使拜太子少師致仕紹聖元年薨年七十四帝臨奠於第贈司徒

諡文簡

江夏縣志 卷六

人物

三

張芸與先世洛陽自張諤官鄂州致仕家於湘東里徽欽南狩時祖樞密叔夜父狀元棟祖母蔡母王闔室殉節白溝河芸與時年十二亦將赴井大將張勇抱持慟哭賊哀之釋去勇乃奉芸與奔靈泉山力耕以給鋤地得金鉅萬乃聘致名儒講求性命之學立祠刻四先人像日夕拜醑哭不絕聲理

宗時勅建坊授太守

舊志芸與訛芸叟作張舜民與叔夜無涉芸與乃叔夜孫今改正按與古贇字說文作與入申部又舊志有張文淵文潛舜民子亦以芸與之訛遂載之宜從刪

明

曾泰洪武初以秀才徵學行允孚上重之每慷慨論事言無

不從超拜戶部尚書祀鄉賢

辜臯洪武初知饒州德興縣招撫流亡聚兵障寇時開礦權銅爲民患奏罷之修學校建橋梁拓秦蕪雞犬相聞遂爲樂土

劉仲廉洪武乙丑進士敦篤有守永樂初營建北京多著勞績陟工部侍郎郭志云劉尚書首應制科備位鼎鉉功在體國望重鳩民爲吾邑士民冠冕偉矣

武楫永樂甲申進士任知縣司牧有方民安如堵秩滿百姓詣留命馳驛復任

曾敬字以恭永樂甲申進士任四川道監察御史陞四川督

江夏縣志

卷六

人物

三

學僉事有賢聲

鄧直字存誠永樂辛卯進士授監察御史上疏言時務十事擢山東藩臬讞獄詳明政事通敏愛民如子卒於官吏民繪像祀之

吳軌永樂癸卯鄉舉授兵部主事廉明勤敏守外艱用當道薦詔起復改戶部遷山東按察司僉事

黎忠字行恕正統中初任建昌推官閩寇鄧茂七攻陷隣境忠屢出奇謀克摧賊銳遷福建知府

王竑字公度江夏人以祖俊卿戍籍陝西河州正統己未進士授戶部給事英宗北狩郕王監國廷臣伏闕劾王振誤國

罪錦衣指揮馬順振黨也厲聲叱言者去竝怒捽順髮嚙其面眾共擊之斃王遣都御史陳鑑籍振家並其黨竝直聲震天下王卽位也先犯京師命守禦京城擢右僉都御史督軍寇退詔偕守居庸簡士馬繕扼塞劾將帥不職者壁壘一新元年浙江鎮守中官李德上言謂犯闕賊臣不宜用帝以于謙等奏曰廷臣忠義朕已知之八月竝以疾還朝尋命同督漕運二年冬敕兼巡撫淮陽廬徐和兼理兩鹽課淮鳳徐大水開廣運倉賑濟自劾專擅罪帝喜曰賢哉都御史活我民矣四年進左副都御史英宗復辟石亨張軏追論擊馬順事除名編管江夏帝旋感悟詔送歸里天順五年字來寇莊浪

江夏縣志

卷六

人物

四

用李賢薦起竝故官擊退孛來復令督漕淮陽淮人歡呼迎拜數百里不絕憲宗卽位召爲兵部尙書時將用兵兩廣舉前侍郎韓雍爲總督討蠻而雍新得罪眾難之竝曰天子方棄瑕錄瑜疑雍罪不當用竝非罪廢者耶卒用之成功兵部貼黃缺官偕廷臣舉修撰岳正給事爲李賢所沮憤然曰吾尙可居此耶卽引疾再三得致仕初號其室曰蕙菴歸休家居二十載卒正德中贈太子少保諡莊毅

陳文偉正統丁卯武舉膂力過人嘗曉行遇虎手搏斃之會試場屋火文偉左據牆右持同事生履肩而出活若干人知安邱縣有賊百餘掠庫金去單騎挾彈馳追之彈發中賊首

左目再發中右目賊伏地請送金還抵縣請死偉曰鼠賊何足污吾又各杖三十遣之而御史竟以縱賊論免官弟文英子完皆鄉舉

王庾字仲景正統壬戌進士任戶部給事中因邊患以練達改御史巡按山西練兵守備事平遷左給事中景泰初勅鎮河南歷官廣東右布政使

蔡淑正統初歲貢由教授升大興知縣長於吏治性戇直不畏權貴邑人德之有強項之目

劉允寬字公量景泰庚午鄉舉任嚴州通判遷霸州牧霸爲九河故地寬造橋梁水患除大學士劉健爲作記又積粟四

江夏縣志

卷六

人物

聖

萬斛銀三千兩備荒考滿州民請留巡撫彭韶下所行令他邑爲法歷任十二年遷慶遠同知所至以方正聞致仕歸言諸不便於當事多行之

劉餘慶字廷吉景泰癸酉鄉試第一天順初選知縣同選二十八人是夜上夢二十八宿見因盡授御史餘慶以浙江道歷貴州副使時都勻作亂捐俸撫綏事平致仕刑部嘗稱其斷無主之冤存有孕之婦居鄉絕跡公門獨以清白遺子孫辛浩字養正正統壬戌進士任監察御史彈劾不避權貴謫戍遼陽俗不尚文學浩選將校子弟教之皆有成天順中復其官所居今猶傳辛家巷

徐鏞字用和成化乙丑進士授行人遷監察御史巡視通州時濬大通河鏞獨疏不可既而漕舟果不達巡按福建多善政還朝以災異陳疏條議獻貢賦正課程革奸弊均祿食四事臺長重之又極論名器之濫請汰冗官會宮變請免慶成宴謫鎮原知縣修豫備倉掘地得古窖錢千萬悉周貧乏代流亡輸逋課改臨潼令父老泣送之宏治初遷淮安知府累轉至督漕副都御史

徐鉞性孝友宏治庚戌進士授浙江瑞安知縣有德政遷戶部主事再補工部監蕪湖關稅以母老乞終養正德中起禮部員外郎遷肇慶知府致仕歸

江夏縣志 卷六

人物

三

徐鈺字用礪與兄鉞同舉進士弱冠使交趾交人烹猩首以進鈺舉箸刺其兩眼交人悚服改南貴州道御史正德元年大臣與言官請去劉瑾帝猶豫張敷華上言謂徐鈺等連章論列但付所司旋告歸嘉靖初起漢中知府歷四川布政使

今子姓俱在墓葬洪山之陰明史鈺江夏人附趙佑及張敷華傳

張璞字中美史作中善宏治乙丑進士由歸安縣名授御史正德

八年巡按雲南單車周視時鎮守太監梁裕貪橫為劉瑾心腹濫取民財璞裁抑之又將論劾鶴慶同知敖英貪酷裕與

英構謀誣璞瑾因逮璞下獄刑部主事孫繼芳上疏力爭不

報死獄中嘉靖初贈太僕寺少卿賜祭葬明史璞附張文明傳

曾賢字時望天順甲申歲貢參雲南曲靖府軍事善於折獄
當情協律攝官南甯土官安束安奢兄弟仇殺賢爲區處開
導仍相歡好各餽以金馬不受

牟盛字汝登正德丁丑進士授吉水令有清白聲識羅洪先
於諸生中宸濠之變武宗議親征調度百出盛獨急保障吉
水賴以無恐遷戶部主事歷郎中不媚閹監尋以內帑盜發
坐典守落職歸執父母喪廬墓盡哀及卒羅洪先爲誌其墓
羅英字汝延正德甲戌進士授戶部主事遷員外郎再遷安
慶知府稱清白吏所較量斗斛秤尺以銅爲範安慶人至今
守之曰羅斗羅尺歲旱步禱得澍雨郡人立生祠仕終參政

江夏縣志

卷六

人物

三

韓楷字以正正德辛巳進士授刑科給事遷掌禮科以議大
禮受杖時建世廟於太廟東帝欲從何淵言毀神宮監伐林
木以通輦道楷諫忤旨奪俸出知池州府歷江西左布政石

副都御史巡撫雲南致仕歸

明史英附何孟春傳又見石瑄傳

李珍字貢甫舉正德癸酉鄉試授四川大足教諭時張副使
獲玉兔屬珍作玉兔賦獻於朝臺使者交薦珍或勸賄銓曹
可就徵不聽授樂安令革坊里耗銀諸費入覲各里長醮贖
六白金卻不受以例請乃盡屬庫吏代逋賦及贖緩調陝西
紫陽縣時學宮祀典不備著祭祀儀注給諸生演習邑故乏
科第自是不興珍雅意山水不喜仕進歸田後閉戶讀書與

人交寬厚稱長者

康科正德己卯鄉舉性骯髒不諧俗兩任知縣以忤權貴罷歸囊篋止餘俸金八錢誦讀不輟督學顏公胡公造訪褻衣出見卽謝於家不復答拜

翟表字玉之正德己卯鄉舉授松江教授遷知縣御史行部乘馬馬逸知府令表往御表曰焉有令長作御史廝養卒者乎卽拂袖去改蘇州教授

趙遷字明遠宏治乙卯舉人由南昌學諭陞江山知縣撫字得民心時逆璫擅權誅求無已遷遂挂冠去

吳貞正德中貢太學部試高等授陝西鞏昌通判奉命市馬

江夏縣志

卷六

人物

四

西戎又從征香爐山賊有功致仕歸囊橐蕭然

吳憲嘉靖初歲貢授邳州同知擢東昌府通判累攝高唐州事民歌十政

吳旻字子仁嘉靖壬午舉人由博士遷華州知州有異政華人德之歷官工部員外

王守成字儒卿嘉靖庚子舉人任順德知縣忻州知州建白祿銀蠶桑包充等六事忻人稱便後遷袁州府同知致仕歸張希范字子任嘉靖己酉舉人授四川蓬溪知縣平白蓮賊有功授五品服色

馮世雍字子和一字三石嘉靖癸未進士博學工書及詩古

文辭由吏部郎中出知杭州府調徽州有惠政忽棄官希時
楚愍王恣睢世雍譏諱自如著有三石文集呂梁志行世祀
鄉賢

呂調音字宗夔嘉靖辛卯鄉舉歷汝陽青浦知縣遷眉州牧
所至稱廉平宦歸猶如寒士知汝陽時識趙賢於總角及賢
撫楚數造其廬調音一無所請某王以罪廢行千金爲壽斥
去沒後趙爲表其墓祀鄉賢

彭翼衡字孟登嘉靖丁酉鄉舉由長葛教諭遷中牟令值土
寇攻城督民兵親戰殲巨魁馮錫張東等有功遷甯州牧
甯俗輕悍忿輒投崖死翼衡爲約法民不敢犯尋以母老告

江夏縣志

卷六

人物

畧

歸甯人思之立生祠

張鵬字之遠嘉靖丁酉鄉舉授浙江金華通判濱海多盜弭
緝有方歷官九載多善政常識熊廷弼於童時許以國士子
應箕孫枚均貢生任知縣

周冲字深甫嘉靖癸卯舉人由德平教諭陞江安令廉潔有
惠政會檄採買多病民遂上印綬辭歸署中公物一無所取
家人私一幔令還之居林下貧若諸生年七十七卒祀鄉賢
余蔭字庇之萬曆閒恩貢授普安州判有土司專擅不軌頭
目張朝覲翼之蔭至矢志振刷覲懼假饋檳榔納賄卻而杖
之以廉潔列薦剡遷汝甯同知丁內艱未赴任遭覲返囑聞

之憤鬱卒

郭懋字子德嘉靖己酉鄉舉授杞縣教諭流寇薄杞令棄城走懋毅然居守民藉以安兩臺檄代行杞事廼集丁壯日張蓋鼓樂巡城宣言大軍且至賊引卻事聞遷威遠令遭喪起補舒城令舒故無城多訟因範土爲垣令訟者如式輸之當金矢不半載城成後遷趙州牧以子正域貴贈如其官

侯應爵字天錫嘉靖戊午鄉舉授乳源知縣請浮糧二百石均徭於英德持訟於曲江韶人德之攝象新會創建海城遷廉州同知勦羅傍首功超遷羅定僉事又擒徭寇飛龍虎等遷貴州參議以母老乞歸地方利病知無不言楚賦徵米食

江夏縣志

卷六

人物

哭

衛軍謂之府米力請當道裁其半年七十七卒

曹當勉字可賢嘉靖壬戌進士授行人遷刑科給事中出知開封歷霸州兵備江西參政生平無遺行蓋純篤君子也

詹朝字伯時嘉靖辛酉鄉舉任盱眙令清廉勤慎識馮慕岡於諸生許以國士調儀隴採木有功遷廬州通判致仕歸杜門不出

張天祐字仁一號鶴山七歲能文日誦六千言過目不忘洪武癸酉舉人甲戌進士擢詹事多方輔導太祖敕賜忠良正直四字褒之戊寅致仕歸宣德二年屢詔起爲臺諫以諫廢后忤旨歸

舊志載天祐由南京吏部尚書晉位冢宰薦張統自代陳
愚谷按明史天祐無傳七卿表吏部尚書並無天祐名任
吏部者張統非張統
今刪節之以存其略

張天祿由廣西布政司擢四川巡撫十有七年屢辭不可勅
永鎮民甚德之

張必貴字榮三洪武丙子舉人出爲縣令以治行卓異遷太
守御史舉其才除主事永樂中擢三邊都御史以廉直著

殷承敘正德甲戌進士授刑部主事以諫武宗南巡受杖穆
宗嗣位贈光祿少卿

陳之清字淡夫萬曆庚戌進士授晉江令累遷山西副使所
至卓有聲政魏璫柄政乞養歸

江夏縣志

卷六

人物

七

周文卿字蓋之隆慶辛未進士授韓城令艱歸起補南海以
清潔聞縣多虛糧爲累乃清沙坦以無稅之坦補無田之糧
共七百餘石又小海中所在多漏源文卿不避權勢悉清之
以利農創建龍津橋以濟行李至今南海猶祝之遷戶部主
事遼東管餉郎中陝西兵備副使致仕歸著詩經便意行世
江沛然字應吾隆慶辛未進士知吉水俗多溺女沛然首禁
焉擢懷慶推官歷南都察院經歷執法不阿海忠介亟稱之
著有歐陽老人稿

周廷臬字子陳隆慶庚午舉人由松滋教諭陞蕪湖知縣調
四川東陽清惠愛民轉雲南府通判辭不就

張維貞字兆甫號瑞明父應陽由餘干徙江夏後應陽以卒
選卒京邸維貞徒跣輿櫬歸自爲諸生時與宗伯郭正域齊
各所得廩餼盡給宗族之乏者登萬曆庚子鄉試授南漳教
諭遷國子監正歷陞冒外轉郎中所在冰蘖自持嘗自謂一
路寒局窮而彌堅也尋出知南甯府軫恤災荒擢雲南按察
司副使覲行時士民扳留遮道抵京乞休歸兩與鄉飲年七
十五卒著有荆玉鈔正續二集思鱸錄崇禎初祀本邑鄉賢
及南甯名宦墓在八分山大學士賀逢聖爲之誌

常居敬字惟一萬曆甲戌進士授南昌推官訊獄詳慎遷戶
科給事尋掌工科以督理漕河功遷太僕卿巡撫浙江時倭

江夏縣志

卷六

人物

吳

寇披猖募兵三千人討之以千人助攻甯夏糗糧自辦上嘉
其忠祀鄉賢

張文光字公覲萬曆戊戌進士授檢討以楚藩事忤沈一貫
謫光山縣丞久之遷尙寶寺丞每慷慨陳言述古今法戒修
身講學之要尋遷少卿乞差南巡卒於道祀鄉賢

丁應泰字元父號衡岳萬曆癸未進士授休甯令擢刑科給
事中建言忤旨謫山西照磨起登封知縣陞兵部主事參謀
朝鮮劾楊鎬喪師張位沈一貫與密書往來疏辨激上怒罷
歸卒朝論惜之

郭正域字美命號明龍父懋仕趙州牧兄正位國子監丞正

域生而卓犖博通載籍有經濟大略自守介然人望歸之登
萬曆癸未進士選庶常究心朝典丁酉服闋授編修二十二
年充東宮講官三遷至庶子不離講幄首輔沈一貫初爲教
習師望其執弟子禮正域不少屈附銜之二十六年遂出爲
南京祭酒條上監規七事請仿司馬光十科胡瑗二齋以揆
眞才罷納貲充貢重明經之選李都督者甯遠之孫魏國之
壻也以就婚騎過文廟門學錄李維極執而扶之侯家奴百
數踣邸門而甯遠魏國亦盛氣至正域日以學錄扶都督誠
過然公侯子入學習禮亦國子生耳安得走馬過廟門今以
先師扶國子生非學錄扶都督也令交相謝而罷三十年徵

江夏縣志

卷六

人物

完

拜詹事復爲儲講擢禮部右侍郎掌翰林院踰年遷部攝尙
書事是時次相歸德沈鯉有清望正域與鯉善一貫意思鯉
益恚正域爲之助夏饗廟會日食正域言禮當祭而日食牲
未殺則廢朔且宜專救日翼日享廟從之夏至陪祀諸臣託
疾不至域謂祀事不虔由上久不躬祀所致請下詔勅厲其
意實以諷切人主回回人侯內府玉價羈留病死號泣道左
正域曰明主可以理請奈何以小費失外夷心疏請支給詔
趣承邊庫予之臺官嘗上日食占曰日從上食主君用佞臣
以亡其國一貫怒而詈之曰妄言禍福者當參正域曰宰相
憂盛危明固不若瞽史乎彼能參我能救一貫氣沮兩淮稅

監魯保請專勅關防兼督江浙織造一貫欲予之正域曰督造卽礦稅之別名保得關防是總督四省也勅可予關防不可予力爭止秦王以嫡子久未生請封其庶長子爲世子詔趣議正域亦執不許王復請封其他子爲郡王又不可一貫使大璫以上命脅之正域榜於門曰秦王以中尉進封庶子當仍中尉不得爲郡王如年未五十庶子亦不得爲世子一貫無以難及建議欲奪黃光昇許論呂本謚一貫爲本同鄉曰我輩在誰敢奪正域判曰黃光昇當謚是海瑞當殺許論當謚是沈鍊當殺呂本當謚是鄢懋卿趙文華皆名臣不當削奪也議上舉朝韙之而卒不行會楚宗人華越上書告楚

王華奎非蔡王子事下禮部正域請勅撫按勘一員言親王不當劾但當體訪時朝臣多受楚賄謂正域故王護衛中人修怨陷王用以盡力排正域旋罷楚事勿按正域四上疏乞休去甫去而妖書之獄起妖書者卽所謂憂危宏議也不知何人所爲一夕閒宮闈都市皆遍上見之憤懣詔大索一貫風臺臣康丕揚錢夢皋等疏稱出正域手而沈鯉同謀詔聽勘都督陳汝忠遂發卒圍正域於揚邨舟中鈴柝達旦聲言正域且逮逼令自裁正域曰大臣有罪安能自屏野外乃盡械其僕婢及傭書者拷毒備至竟無所得先是東廠捕得京諸生皦生光嘗以宿恨造妖詩大書鄭戚之門者比會鞠嚴

刑必欲令引正域生光仰視丕揚夢皋罵曰死則死耳奈何
誣郭侍郎光宗在東宮語近侍曰何爲欲殺我好講官諸人
始懼又御史牛應元沈裕比部王述古皆力持之獄乃解正
域歸十年乃卒年五十九贈禮部尙書賜祭葬天啟初奉光
宗遺詔贈太子少保謚文毅蔭一子中書舍人著有皇明典
禮志武昌江夏府縣志十三經補註離黃草

常居安字惟靜萬厯戊子鄉舉授隆昌令安奢兩蠻構釁時
議勦以隆儲佐軍居安請留備旱贖抗者再後廷議竟與居
安合而隆果早得以賑濟遷延平通判攝福甯篆有議量革
海艘省費者復力持之曰海寇叵測無貪省事之名後海寇

江夏縣志

卷六

人物

五

果大發人皆服其深計

段然字幻然萬厯乙未進士授南平調吳縣守制復補輝縣
所至有異政遷南戶科給事中嘗論救李三才疏劾王錫爵
以宗室華越訐楚藩上疏與首輔沈一貫不合謫江西按察
司知事久之遷兵部員外

游士任字肩生由嘉魚徙江夏萬厯庚戌進士任長興知縣
遷廣西道御史獻替可否罔不中窾魏瑞附客氏蠱上心士
任慨然曰此亂本矣會差山東巡按監軍陸辭先一日疏忝
客魏自是臺省交章瑞既矯旨逮殺楊漣並逮士任下錦衣
獄拷掠備至謫安慶成崇禎改元乃詔釋之還其冠服

葛大同字更生號君山性廉介工行草萬曆丁酉鄉舉就藝
陵學諭陞南雍學博晉繕部郎於庫羨金封識以備公用遷
袁州知府歸里杜門謝客以詩酒自娛貧乏至茹水絕不干
與當事

佟卜年字觀瀾養真族子

見明史
王紀傳

萬曆丙辰進士初知南皮

調河間縣遷夔州同知當全遼多事經略熊廷弼疏薦卜年
有經濟才陞山東監軍僉事力辭不允因寄家楚城單車之
任後廷弼被論璫黨並構陷卜年都御史鄒元標質問時嘆
曰此莫須有事何由判斷耶刑曹顧大章亦力爭之不能救
竟死於獄時年三十八獄中題壁云生逢堯舜死慕夷齊首

江夏縣志

卷六

人物

三

陽無愧天日鑒之又自著有幽憤先生傳祀鄉賢墓在楚城
忠孝門外子國器

國初歷官福建浙江江西巡撫所至有聲致仕後家金陵

湯泓成化乙酉鄉舉第二後爲令著治績同鄉祭酒張輅薦
其賢擢御史力謝歸里時論多之

張通字長空號東白萬曆辛未進士官黃門吏以文行著人
爭師事之江浦然哀輯所著曰歐陽老人集

按選舉志無張通舊志纂
人不知何據附注俟考

劉民悅字時可年五十始舉鄉試己未成進士授富順令每
讞斷不肯曲承上官指以不合歸天啟辛酉請閑地得教授

蘇州釐定祀典遷南國子監尋遷南戶部主事管江北倉務
舊有贏羨盡籍報部時鄭三俊爲尙書服其廉正指所坐期
之遂以郎官高等遷汝甯知府郡有八部通家把持官府民
悅廉其名不少貸以是不久任而歸築漢陰園開渠具塲道
遙林壑以壽終著有杖景園集慎語作喻錄富順汝甯日厯
蘇郡學誌及勸民曉俗諸書雋尾集秉燭編瓊尾集行世
曾先字覺吾恩貢除博士陞岐山令勤撫字課農桑減賦耗
百姓如得慈母致仕歸年九十二卒

李應選字晉卿天啟乙丑進士令閬中民苦春稅爲定夏秋
二限閬人德之遷主事督餉蘭州禦寇撫民擢靖邊道有功

江夏縣志

卷六

人物

三

歷方伯陞江西巡撫未行卒於藩署清操如水家人炳火莫
繼後十年乃歸葬

金城字天府天啟丁卯鄉魁由景陵學博除四川合州牧稱
廉能州人祠祀之城本漢川羅氏子作告祖文有不背恩義
不忘本源意後乃歸葬於羅

程鐸字仲聲其先隨州人崇禎戊辰進士授惠州推官多所
平反會九連山賊程萬等亂獲諸州廖理申乃萬素憚服者
鐸因理申單車抵賊巢諭以大義萬歸命其黨鍾林秀猶負
固遂率萬往殲之凱旋疾作取筆書英雄氣短四字而卒
吳元伯字開吳崇禎癸酉舉人庚辰會試下第特恩八月重

試賜進士授禮部司務歷員外郎遷山東沂州參議途次遭
甲申之變挂冠歸以子升東贈御史

丁時魁字斗生崇禎庚辰進士除農部郎督餉江西是時歲
祲時魁措措經營輓運籌畫後值秣陵解體狼狽走袁山出
沅陵入牂牁永明王永曆元年授給事南雄破王懼走梧州
御史陸源許時魁十罪下獄瞿式耜七疏論救不納遣戍定
南藩羅致之請用時魁固辭求歸省墓不許留軍中常縱飲

沈涵數月以卒

參明史瞿式耜傳

馮尙字汝義號杏臺嘉靖戊午鄉舉選睢甯令調考城有惠
政以介直去民德之立生祠學宮側

見考城名宦志

江夏縣志

卷六

人物

壽

董暹字長馭萬曆甲辰進士授建陽令人為吏部主事以同
里有忌者改南吏部尋論歸暹怡然不為意壬戌起禮部主
事遷員外郎提學廣東所拔多佳士陞山東濟南道遷按察
使漕運都御史李若星疏薦陞布政使致仕卒有白社集
朱容楯楚藩宗室崇禎時任無為牧饑饉之後繼以兵燹楯
修整城濠招徠百姓戴星出入登著勤勞

張翔南以明經授沔陽州學博訓士有方擢梁山令多惠政
陳蔡明萬曆時順天府丞江西督糧道居官以廉稱

魯鑑字冰長崇禎癸酉舉人甲戌進士願試間職就留都教
授遷國學博士歷禮部郎中提督雲南學政滇申士習文體

爲之一振癸未晉太僕少卿值流賊亂南北梗塞不能赴留
雲南署藩臬七印迎刃而理後閒道歸里隱居湖濱孝事繼

母屢薦不出鄉黨重之

府志才猷傳

劉崇舉初任河南西華令會年荒多方軫恤巡撫御史廉其
賢奏擢陳州牧

劉崇文歲貢初任永定衛廣文課士有方報最擢四川開縣
令多善政民思之爲立祠祀

國朝

張廷賓字上卿一字天若崇禎己卯鄉舉司鐸崇陽修葺學

署順治乙酉餘賊掠害劫各宿陳某賓解其圍順治六年己

江夏縣志

卷六

人物

五

丑成進士任黎城令討平山賊親歷村鎮撫集流亡極戴而
還者相屬既王師旋經黎邑單騎伏謁請禁侵掠卒於官
著有長安春集

魯可遠字遠公有文名順治初以拔貢授瑞安知縣道經溫
州海寇已攻陷瑞安並因溫州可遠在圍城中代畫守禦策
寇退赴瑞安甫至增修墮堞木城未幾寇復逼可遠授計守

將汪勇出奇兵破賊自是賊不敢窺瑞安以勞疾卒

府志才猷傳

陳昌謨字允明順治甲午舉人博覽羣書留心經濟選授陝

西武功知縣值康熙甲寅之變籌時務立軍功多所建白歷

耀州知州廿甘肅慶陽府知府以疾卒於官所在士民稱之

吳琮字峻季號鵠磯御史裕中季子裕中被杖卒琮同諸兄
與槻歸葬絕迹城市懷宗卽位薨恤死諫諸臣琮始出試旋
中丙子副車順治初授嘉魚學博教生徒讀書務實學作人
務實行康熙壬寅除直隸任邱令兵燹後學宮荒蕪琮捐俸
創修集諸生季課期年人文大盛學宮傍舊有苦井不可飲
琮至化爲甘泉在任九年設天鑒在茲簿畫之所爲夜卽書
之歸田後凡邑中諸不便於民者必爲當事力陳其弊

沈寬字興門少宰惟炳五子仁孝簡重以明經順治初除中
州府幕歷權邑篆所在多惠政隨簡香河令爲少宰舊治寬
益勤慎思續先聲舉驛馬賠補錢糧隱匿諸弊悉清之卒於

江夏縣志

卷六

人物

美

官士民思之建二沈祠以祀

陳鼎字禹九本富平籍隨父承業官金口巡檢父死世亂遂
家焉順治初効用軍門東山之變單騎入賊巢與語彌日賊
遂降當事上其功授雲南廣西州判有惠政時滇南初平米
價騰踊創爲分糶之法郡邑効之兵民以和移疾歸癸亥邑
大饑中丞張朝珍檄令監賑竭力輸助年七十八卒

陳治道字質修博學工文順治初以明經司鐸漢陽造士有
方載漢陽府志子三俱名諸生治道曰吾旣以詩書遺子於
願足矣遂解組歸

楊兆傑字又仁少儻父五美以武舉圍練北山山豪張其

倫掠入巢勒以良馬贖傑往請舍父歸謀之乃留傑而脫五
美其倫敗傑沒入南陽營弁撫爲子出就試遂首南陽大弁
喜致之戲下適伯父居楚督幕傑潛書附公移總制詢得實
飛騎取還讀書攻苦每念曾祖下皆懸櫬署案曰四喪未舉
兆傑忍忘之子丁酉領鄉薦謁選授大理推官措兵籌餉悉
中機宜平反大案數十入爲兵部職方主事戊申安南王黎
維禧逐都統莫元清寄滇境廷議推兆傑賜正一品服偕侍
讀李仙根往諭抵交交輔鄭檇等殊簡傲兆傑引典切責之
渡富良江維禧迎謁如儀獻高平四州地及降人黎莫禍乃
豸庚戌

江夏縣志

卷六

人物

七

稚淮關以憂歸會西南變起逆謀陳鵬舉走險分布僞劄妄意兆
傑官滇中因誣附其名事聞被逮鬱鬱死旋奉

旨滌除兆傑孝事繼母異母弟三皆愛如手足艱於嗣繼弟兆億
子官大理時買妾何氏詢知其夫在立還之所著日南紀事
雜詩文藏於家

汪鏞字鐘如康熙庚戌進士初任中書轉戶部主事典倉差
嚴察諸弊吏役凜然嗣考選吏部歷四司者十年清品流選
賢能凡黜陟大政引例據典持正不阿乙卯分校順天甲子
典試陝西咸慶得人鏞爲諸生時家貧事母孝及官京師留
室於家未幾卽請假終養母卒哀毀幾絕性尤友愛嗜理學

以不欺清夜爲要祀鄉賢子四泐歲貢生潑歲貢生松滋訓
導澧康熙丁酉副榜四川敘州知府澧康熙甲戌進士累官
江西廣西巡撫

鄧文源字蒼麓康熙丙午鄉舉除任邱令潔己愛民以最擢
比部理山西司讞案聽微決疑前後得減等四百餘人移水
部虞衡除鞏昌知府以憂還

龐還樸字魯生本姓袁先世石首人父以亂寓江夏因家焉
康熙丙午鄉舉授梓潼令招輯流逋民以安集晉知荊州荊
故多頑梗度不可革乃陰遣健隸縛其尤者斃之奸人屏懾
甲戌夏蝗蝻大作晝夜掩捕積勞成疴堅乞休致

江夏縣志

卷六

人物

五

胡鳴皋字雲翥父德園潛心理學爲楚名儒皋中康熙庚戌
進士除河間青邑以逃案報罷巡撫于成龍特疏開復補蜀
汶川令汶故羌番出沒地抗賦叛役無甯歲皋宣恩德不辜
乃請兵擒其魁羌番以安擢代州刺史代役苦偏累編審時
逐戶研訊役遂平內艱服闋補臨清卒於任

陳肇昌字扶昇號省齋順治閒徙黃岡戊戌進士授寶雞令
招徠撫字蠲除逋賦有賢聲陞工部主事轉員外督淮安鈔
關晉戶部郎中提學粵東入爲僉都御史授順天府尹凡廷
議會推秋讞諸大政條上輒報可好讀書雖在宦僚不廢鉛
槧晚尤精於易作易潛數十篇有南湖居士集行世子大年

大章大鞏大羣大華大輦俱登科甲

陳肇熙字若周肇昌季弟以歲貢補平江諭平故巖邑兵燹凋敝熙首建學宮與諸生講習先孝弟次文藝平令以催逋賦急致民譁請師公馳見郡守力保無他遂得駐師境上會奉藩檄督催熙委曲開諭民爭輸納一如常額嘗自顏其齋曰三耐蓋耐貧耐辱耐久也左箴曰恕右銘曰謙所著有天岳集湖南草

張耀字蔚章本籍姑蘇以父伯達令黃陂因家江夏之塗川少負奇姿爲文磊落不羣康熙己酉舉於鄉授直隸永年令猾民佐吏爲奸一繩以法會大旱徒步以禱甘霖立沛繪監

江夏縣志

卷六

人物

五

門圖請賑獲內帑給發無中飽邑多盜擒渠魁置諸辟卒於官

周國貺字我嘉醇茂質直康熙丁丑進士除山西岳陽令清廉愛民卒於官貧無以殮民爭醵錢爲治喪事

王開泰字乾來號魯岑康熙庚辰進士由庶吉士改授博羅令舊例有大徭役火耗繁重民極困弊開泰痛革之訟牒即日判決發奸摘伏出人意見絕請託鋤強梗卹孤勸學上下稱之艱歸民扳輿泣送有至千里外者服闋補慶元令慶元地居浙江萬山中民俗刁悍多負固前令威治之卒不服開泰一以理論悉皆向化民間有積冤仇構十餘年至棄墓廬

而竄爲平反之遂各歸業僅八閱月瘞疾卒

婁玠字介山號東村幼補弟子員康熙甲寅吳藩倡亂黔戎帥趙賴以禮召之從趙討平江西及黔中錄功授狄道令狄故土瘠民貧玠爲均徭賦嚴保甲峻緝捕朞月大治乙亥

上親征噶爾旦玠領後軍所至相山川形勢爲詩繪圖以志名曰廣漠紀事兩舉卓異遷京兆別駕陞戶部員外未任卒

陳一道號貞庵崇禎丙子鄉舉順治初攝嘉魚縣事丁亥成進士令孟縣勤敏清慎多善政公餘寄情詩畫牡丹竹蘭尤勝

方文瑞字河書號體庵世居永豐里康熙甲戌進士授河南

江夏縣志

卷六

人物

卒

考城令時水旱游饑民多轉徙瑞勤勞撫字開渠築堤民得安業邑庠舊額八名瑞題請得比中縣行取工部屯田主事饋遺一無所受乙未分校禮闈得殿撰徐陶璋擢工科給事中遷禮科掌印都給事瑞至性純篤所得俸錢置義田以贍宗黨嘗以母老不能迎養爲念洎聞訃撫膺哀慟歸里遂邁疾卒

胡潤字河九號京蒙康熙辛未進士授編修己卯典試廣東所拔皆名宿遷國子司業歷翰林院侍講左春坊左庶子以內閣李光地保奏提學江南得士爲多句容有富僧以占產誣良士潤洞門親鞠勿拒觀者僧服受杖士氣奮焉所著有

懷蘇堂文集良園詩集行世

汪紹遠字十雲先傳姓子嗣汪文極後年少力學事嗣母以孝聞由歲薦授廣濟司訓捐修學宮按邑先賢之湮沒者請崇祀之事載通志轉安陸教諭重建啟聖宮敬一亭以卓異薦又校刻禮樂志圖委葺江漢書院勞績為多陞教授卒於官祀安陸名宦

崔應階字吉升號拙圃以父相國武功廕補順天通判歷西路同知山西河南知府乾隆十五年

駕幸中嶽嘉其幹練擢本省驛鹽道旋陞安徽按察使壬申隨兩江制府尹會同湖廣制府永按察使明審理羅田馬朝柱逆案

江夏縣志

卷六

人物

奎

事竣丁母憂服闋補官累擢山東巡撫乾隆乙酉春

聖駕南巡道經山左見河決後地靜民安

欽賜續懋東邦匾額併

御製詩一首以褒之

見製詩文類

御丁亥調福建巡撫戊子陞閩浙總

督進太子太保刑部尚書轉左都御史戊戌冬年八十

欽賜柏臺耆瑞匾額庚子解組歸歿於途次著有拙圃詩草黔遊紀

程研露樓琴譜官鏡錄行世

葉方慈字青岷先世由徽遷江夏祖自巖由舉人任黃岡教諭父蕃天候選同知未仕歿母戴同伯母戴苦節撫教方慈天姿聰穎潛心好學幼懷大志緣一門孀苦急於祿仕由貢

生任貴州威甯府通判以廉能卒於官著有挹翠山房詩集
子三長仁候補同知存仁官河道總督體仁舉人官四川敘
州知府

葉存仁字心一號墨村父歿母崔氏爲總憲應階姊見存仁
慷慨有爲命援營田例敘職州同受知禮部侍郎王圖炳保
舉河工効力由縣歷廳乾隆十年陞江南淮揚道游陞浙江
安徽河南廣西藩臬屢著賢聲二十七年擢刑部侍郎與侍
郎阿永阿審理四川南部縣案二十八年巡撫河南

特賜報匣許便宜奏陳又與侍郎阿定讞本省歸州盜案謹嚴平允

隨授河東河道總督加兵部尙書銜甲申卒於官性孝友待

江夏縣志

卷六

人物

三

同母兄長仁異母弟體仁雍睦無閒言居官甘淡泊不苟取
嘗卻饋賦詩曰月白風清夜半時扁舟相送故遲遲感君情
重還君贈不畏人知畏已知其自勵如此子道明江西安徽
同知

汪濬字荇州錞第四子康熙甲戌進士授編修歷侍讀侍講
學士大理寺卿內閣學士兼禮部侍郎提督浙江學政巡撫
廣西江西監理山東河務屢著賢聲懋績詳載浙江省名宦
志

王開銓字衡季號山公康熙壬午與仲兄開運同舉於鄉謁
選授平彝縣多善政尋調新平先是土苗有疑獄官繫其妻

子苗保聚勢將蠢動銓至爲白其冤苗聞感泣銓單騎往諭歸其妻子遂得帖然擢知姚州內遷行人司稽查海運倉兼禮部主事廉直有聲

葉啟豐字履廷父宏韜以選拔官內閣典籍啟豐隨侍父就試京邸成乾隆戊辰進士授刑部主事歷員外郎中判獄輕重悉協遷御史直言敢諫風節凜然

王璵字魯玉雍正甲辰進士授安邱令性剛直不肖諂事上官數月卽挂冠歸

陳正勳字書竹乾隆丁巳進士累官除臨縣調臨晉時弟正烈以明通榜令汜水相距不遠迎母胡往來就養兩縣權汾

江夏縣志

卷六

人物

三

州同知艱歸起補重慶奉委西藏發餉三年番人悅服摘奸剔弊人稱青天

王道暉字星南乾隆壬戌會魁歷官項城南陽知縣迭著賢聲三校鄉閭所得多知名士兄道明庠生弟道昭廩生子元彪姪元凱俱庠生

歐陽照字廡年號臨川乾隆辛未進士任雲南趙州牧時值軍興偵獲湖南謠詞要犯旋遭疾卒未竟其用子墜丙午舉

人孫震庠生

以上
東志

龍鎬字卜西癸酉拔貢以教授終造士有方人皆尊爲模範胡述文字琴垞少失恃昆季三人孝友無間由嘉慶乙丑進

士宰浙江景甯邑俗朴陋文至爲建鴉峰書院捐給膏火士
風一振庚辰邑大旱請平糶並捐廉設粥廠四鄉調任平湖
時江蘇金山縣有陳姓幼童被仇勒死原審係童母因姦謀
殺關提平邑左證文訊知誣枉詳請檄調委審得實擬抵邑
有當湖觀海蘆川新溪四書院爲加增膏火獎勵之適督學
查辦漕棍責縣各舉發劣矜文以無人累詳獨免里有水旱
災必分俸寄賙寒賤並令家人運米賤售後陞湖州烏鎮同
知卒善隸書著有漢石齋隸通隸補隸證同證誤等編

○文苑

晉

人物

江夏縣志

卷六

畜

孟嘉字萬年吳司空曾孫少知名太尉庾亮領江州辟爲
從事亮嘗大會賓客豫章太守褚裒問嘉安在亮令自覓裒
歷觀得嘉益器之後爲桓溫參軍九日宴龍山參佐畢集風
吹帽落嘉不覺溫命孫盛爲文嘲之嘉請筆作答文詞超卓
四座嗟歎後遷長史

晉史江
夏郡人

李充字宏度汝南太守通之孫善楷書王導辟爲丞相府掾
累遷中書侍郎嘗著學箴宗本仁義雖是非不能無謬於聖
人然與慕元虛而爲倡披者用心自別時典籍散亂充删除
繁重以類相從分作四部甚有條貫又著有周易尚書註釋
莊論詩賦表頌二百四十篇子顒亦有文義多所著述郡舉

孝廉從兄式以平隱著稱善楷隸中興初仕至侍中

梁

費昶善樂府又作鼓吹曲武帝嘆曰才意新拔有足嘉異昔
郎暉博物卞蘭巧辭永昂之賜實爲勸善可賜絹十匹南史
稱爲閭里才子

隋

黃鳳麟大業中舉進士累遷侍御史比部員外有文集十卷
唐

李善字次孫有雅行少嘗受文選於同郡曹憲淹貫古今而
不能爲辭時人謂之書簏顯慶中累進崇賢館學士兼沛王

江夏縣志

卷六

人物

奎

侍讀坐與賀蘭敏之善流姚州遇赦還寓居汴鄭閒講授諸
生四達傳其業號文選學所注六十卷行於時

明

張誠字應元舉孝廉元末不仕僻處靈泉力學敦行元癸卯
至乙巳骼齒積野竭力瘞之洪武王子以康茂才薦召試白

燕詩賜翰林

盧文政幼嗜學溫雅有度建文己卯舉於鄉授吏部主事累
官太僕丞致仕年八十手不釋卷著有歷代太平一覽

劉淵字伯廣天姿俊逸子法趙松雪詩效薩天錫宣德九年
以經明行修舉宣宗批卷曰文理通暢宜授教職遂授嵩明

學訓改安陸江夏歷京山教諭修舉學政文人多出其門

按舊志選舉並無劉淵且云改安陸江夏訓則似非江夏人矣附注俟考

劉績字用熙宏治庚戌進士博洽經史與李獻吉齊各相友善歷吏部員外出知鎮江府著有禮記正訓太元註蘆泉詩文集以才名擢忌晚年避迹岳陽

任家相字白甫爲諸生時與郭美命齊名學使金省吾貢於廷試第一戊子舉北闈鄉試甲辰乞署婺源學博刻朱子孝經刊設建文起堂輯論世景行二編以楷模多士擢翰林院待詔充福王講官上勸學箴又條陳時務以孝經定試題制宗學以廣人才祠國學以崇名宦鄉賢移工部司務其請瑞

江夏縣志

卷六

人物

矣

王婚禮及諸疏俱無諱乙卯卒於官著有雲龍閣集行世祀鄉賢

蔡文翰正德閒歲貢博學工詩文官雒縣知縣有政聲

周炳靈字公含泰昌元年選貢應天啟辛酉北闈傳良選得卷以元薦座主擬第一復抑置副榜任光化訓導直指薦牘有學富五車才傾八斗之語陞興縣令卒於官所撰詩文多燬於兵

梅逢甲字郢青幼補弟子員崇禎己卯副榜第一獻逆之難迹跡湘東鄉以詩酒自放性孤潔與人飲雖諧謔歌罵自如而人不敢犯

劉敷仁字濟甫與天門譚元春以文行相砥礪凌給諫茗柯林太史可任嘗過訪必屏騶從戒曰劉先生門無雜賓勿以僕御溷高士廬崇禎壬午以曲臺魁京闈甲申歸隱築室餘荷塘著有添學草桐柏軒等集

國朝

胡昌任字任可幼穎悟善屬文爲名諸生著有詩文集以孫潤官贈翰林侍講

龐載字厚伯順治戊子副榜除汾陽令靜以安人人多以拙目之歸田益落拓有乞字畫者必盡醉醉愈佳詩老更入微白號休亭云

江夏縣志

卷六

人物

奎

胡從化字內甯郡庠生腹笥淵博楚藩請爲世孫師終困場屋益肆力於左國秦漢康熙庚戌子鳴皋成進士化始棄諸生講性命之學中丞張修學廟屬主其役廟成條諸當事請以邑先賢吳裕中賀逢聖等置主入祠年七十五兩舉鄉飲大賓著有德園合稿

鳴皋另有傳

陳述知字穉彭本應城籍三世祖金官總制賜第江夏述知生而沈篤留心理學尤長左史傳記以明經授九江司李獻賊屠楚父明域戰賊不屈赴水死母姚氏遇救免述知聞信歸求父遺骸不獲絕意仕進奉母入湘東之青山躬親寢膳至老不衰有司旌其閭曰節孝之門與丁素石周釋元友善

刊楚會存書著有讀史偶見大易偶見四禮訂疑山居紀異
湘東子集

吳元俊字千人號鹿泉總角游庠中丁酉副車任辰谿教諭
年八十卒於官元俊篤內性宅憂六載泣血廬墓一遵古禮
四十斷絃終身不娶遂於掌故通志邑志多所排纂著有喪
禮確遵錄參訂四禮翼北涇語錄學庸邇言周易貫通解自
訟錄河洛圖解香浮堂集相規堂集鹿泉集相港別業楓香
堂手稿

胡弇字射山明越國武莊公裔徙家鄂渚世爲衛籍弇襁褓
失怙負性恬逸食餼郡庠康熙丙辰歲薦廷試第一著有煙

江夏縣志

卷六

人物

奕

棹草居家錄五經正韻

任家楫字升公父伯瀾晚年生楫嗜學通典籍尤長於春秋
教授生徒多所造就著有蒼山集

陳大華字西岳黃岡籍舉昌第五子年十四與諸文士泛舟
鸚鵡洲賦詩曰漢祚日以非志士憤不已褊心固其常英氣
亦何偉不見大小兒捐生同一理長嘯俯大江日暮酸風起
眾爲閣筆舉康熙庚午鄉試第一著有書法緒言凡十卷石
髓詩集性至孝遭內外喪哀毀啜血年三十二而卒

方文啟字梅岩江夏人漢陽諸生端凝和易無崖岸好古法
帖名畫藏書數千卷工吟詠未嘗留草曰詩以適性情豈求

後世知耶卒年八十

姚基延字爾康別字液泉十歲補弟子員早失怙舌耕養母以歲貢授江陵司訓所著有紀年風雅一家言等集

程封字伯建號石門順治間拔貢任按察司經歷未久告歸性喜吟詠遊歷山川幾遍與王阮亭吳梅村杜茶村諸人相唱酬著有山雨堂詩集

段燦字以融任衡山縣訓導讀書論古有卓識家居金口鄉引陶淵明夜行塗中詩金口卽爲古塗口辨之因以陶谷爲號著有陶谷詩文集

欽士佃字文思號筠菴本姓周江夏人寄籍黃岡少孤貧汲

江夏縣志

卷六

人物

七

水拾薪養母以孝聞康熙癸酉鄉試第一庚辰成進士選翰林庶吉士性磊落無城府工詩歌古文掌院韓葵推重其文謂爲尹師魯梅聖俞之亞著有瀛洲集代言草

田秉元縣學生敦品力行教授生徒成就者甚多著有明文

端蒙集江鄰詩草

以上陳志

詹謹之字仲庸端方好學爲文根柢六經一時有唐應德之譽崇禎丙子舉於鄉順治初任濟南推官平反大獄以澤物爲懷旋解綬歸里與子孝廉大衍及大衢等潛心理學晨昏講習所著詩文若干卷

府志儒林傳

陳基字受伯十歲能文采芹邑庠學使水公目以神童順治

戊子登賢書己丑成進士官山東卽墨令訓士愛民六年報
最以親老終養歸事母承歡色養真孝子也宦後兩袖清風
瀟灑出塵寄情詩畫尤工竹蘭詩集行世

陳國祝字鶴汀康熙丁未進士學本朱程文宗歐曾所著晴

山堂文集

李之蘭字文莊有異才尤篤學人稱腹笥時義奇真藪纖香
成七構詩古文辭翰動若飛雍正庚戌進士除華陰縣潼商
道命修華山志亟稱之曰盡八百里華山情形不啻坐臥其
間也居官廉介絕姘媵多惠政卒於宦宦橐蕭然著述等身
不能錄梓惜無傳

江夏縣志

卷六

人物

七

王德新字又新江夏人少孤貧力學所遇多名師以善病幾
廢業已賴良友勸勉得勿荒於嬉年二十補學官弟子員久
困場屋因納貢入成均時大司成爲汪文端公一時人才輻
輳輦下先生及莫公晉劉公嗣綰有三鳳之譽莫劉皆掇高
第去而先生僅以考滿得教職歸時朱文正公當國以經學
理學爲天下式海內翕然宗之紀文達公邵學士晉涵劉侍
郎鳳誥鮑學使桂星皆文章鉅手而於先生推獎交至至有
典楚試者憾不得先生無以對長安師友其名重如此嘉慶
戊午始舉於鄉而會試以詩失粘被黜先生自謂倒黜孩兒
吁命矣夫官黃州府訓導年八十告歸又七年卒著有葆醇

堂文集先生於六經諸子皆嘗致力而周官從事最專精心
考核逐字逐句切究之分官分事參詳之其晚年自敘言之
歷歷洵足爲學者治經之式云

王炳文字南皋嘉慶庚申舉人官漢陽府教授性嚴正教士
有法先爲蘄水教諭革陋規勤訓課蘄之士習一變至今有
稱之者著有主敬堂稿數十卷亂後散失其子孫不能守

傳以成字信之性端謹篤學工詩文嘉慶辛酉舉人潛江縣
教諭著有太璞生文集

張德助初名世本字輔材能文章與弟世校皆有聲庠序道
光乙酉同舉於鄉世校先卒德助以校官終士林惜之謂其

江夏縣志

卷六

人物

三

兄弟皆華國才而不獲揆藻揚芬以光耀於世也德助尤篤
行誼善與人交同學有陳殿邦許清源者老於諸生而貧不
自振人輒輕侮之德助終始無閒時有所周恤而不自以爲
德見有一才一藝者虛已下之而獎掖後進尤至唯遇糲糝
子則不屑一顧也兵燹後文字散失僅存時藝詩賦若干篇

○ 行誼

宋

李宗儀與從弟宗儒四世同居好學篤行築書院建祠以祀
先聖給田以贍來學汴京失守程吏部千秋勤王宗儀子彥
章開倉資給軍士

明

郭儀母李氏生儀未兩月卒父再聘李氏生六子愛儀倍已出儀奉後母亦孝儀素豪俠晨起捕魚拾遺金一釜於湖中以足掩坎仰天頓首曰天平如爲儀財勿以不義至當從生理申得之平居持一木梃里巷人有鬪輒杖其不義者人敬畏之

李德智字大癡薄名利好養生術一日晨起見丐者曰某銅鼓衛軍緣輸料銀六十餘金於都司覆舟失文移欲歸請之以挾資涉洞庭恐不免聞公厚德託爲寄存期以四十日已而其人道死遇所知陳大告喪喪歸衛勘官銀以告喪故疑

江夏縣志

卷六

人物

三

陳匿之抵罪德智因其人愆期遂以前銀納都司白其故都司文移勘之陳遂獲免德智生平不苟葷葷八十九終郭太史曰李德智與先大夫善每至令不佞兄弟侍常以寡慾養心陰行善事爲言隱君子也

朱恩楊鏜楚藩引禮生世子英耀張燈於酒閒弑父愍王先設酒菓閉恩鏜別館二人聞變以繩繫腰縋越內城奔巡撫告變狀聞英耀伏法初恩鏜奔出過宮門叩銅環大言曰宮中人世子殺國主好爲藏少子後內臣匿英燠溝中竟免於難而恩鏜以窮老人惜之

任大名字揚之世居龍泉里之團湖因以爲號業儒未就復

歸農能治生產散積粟數百石周鄰里年九十邑令莫揚廉其善狀以冠服牲酒勞之表其門曰逸壽

吳紀字璧山嘗積粟數千石萬曆戊子己丑歲大飢盡散鄉鄰全活甚眾里中有張姓者先世與紀祖同自江右來後貧窘紀數周給而貧益甚將田廬鬻於紀繼且鬻其身紀俱收之後十年紀忽指室中困語張曰此爾產所入也並券與之遣歸命名曰承宗以誌不忘其先世焉子裕中登萬曆己未進士官侍御史爲明忠臣

桂時香字方宇萬曆時郡庠生博學淹貫人以書囊呼之好施濟於白洋橋頭建方便菴爲施茶粥所去橋頭里許湖港

江夏縣志

卷六

人物

三

病涉復捐資建橋橋成見白髮翁口稱盛德轉盼弗見望人以爲仙因名會仙橋

胡富字近山世居東關爲人恬淡寡營營製藥餌濟人病歿無殮者爲具棺槨道隨州店次拾遺金還其主弗受謝子從化孫鳴皋別有傳

胡觀明字來遠郡庠生幼穎悟爲篆籀能究六義八體試輒冠曹獻賊陷武昌大江以北避難者苦無渡觀明與僮僕南船北渡晝夜不遑凡全數千人旣爲逆闖所執逼以官堅不就賊怒刺之幾死是年游饑舉家粥食餘穀濟里中貧者當事額其門曰忘貧利濟又捐資建橋卽今板橋也著有詩經

解感等書行世

程言伊川裔七世祖得二隨明成祖南征有功授定南先鋒始居江夏言少爲博士歷試有聲父早逝事母孝富於財樂施予創置仙人橋費近萬有陰德公之名赴鄉飲者三年七十六卒

李賢洪武初指揮使積屯穀數千石於曹公嘴以給旱潦里人賴之

賀時泰字陽亨父廷秀泰少爲諸生礪廉隅不苟頰笑惟與同里郭正域大冶尹惠州相劇切力貧課子教授生徒著有思聰錄人模樣三世事小錄及女箴二十四則學者稱爲陽

江夏縣志

卷六

人物

七

亨先生嘉靖乙巳歲禳除日斷炊以一伏雌易米豆五升始具三宿食後子逢聖旣貴泰書堂聯曰當年雞豆未忘念此日兒孫莫妄思又爲詩云清苦丈夫志風霜善自持陽和非不愛義命貴安之朝夕訓子者惟餓死事小四字故逢聖自釋褐登揆席恭謹清約如一日卒以忠節顯皆庭訓力也卒祀鄉賢

朱盛潁字異吉明故昭藩九世孫年十四游庠獻逆破城與兄保母笑圍手及數賊得脫隱居教授己未大饑流民騰聚捐賑活數萬人施棺木湯藥代贖掠賣子女修橋拯溺不少斯焉

葉文郁廩生教授生徒多造就旁通孫吳獻逆亂時出討勦
土寇有保障功歲饑自食苦藜推食活桑梓修橋梁濟人甚
多

國朝

張燕翼字安仲順治戊子舉人補黃陂教諭轉國子監學正
禮部司務言動以禮有以金存寄者其人死難仍以金覓付
其子

容自謨字中立邑廩生性醇厚孝友明癸未寇氛陷城殺戮
殆盡守土者莫能禦城東三十里有白楊橋爲通衢比時水
漲謨率鄉勇及家丁壘石堵截寇不敢過全活無算順治壬

江夏縣志

卷六

人物

七五

辰大荒流亡載道謨倡捐里中積粟賑之復請諸長吏奏免
稅糧兵燹後白骨枕藉謨延僧覓收埋之

唐見龍字翼雲邑廩生性孝友族中待以舉火者十數家邑
令徐子卿雅重之獻闖之亂數與賊遇而賊不加害人皆異
之晚年閉戶著書絕意仕進卒年七十五子居中隱居教授
壽八十八歲

胡金鉉字汝實律已端方與人直諫鄉人皆稱長者以子潤
貴贈如其官

徐封英字青嶼嘗設義田義學教養族中子姪順治壬辰大
饑運米數千斛賑飢者康熙己未又歉復率眾樂輸助賑官

署其門曰樂善不倦癸亥舉鄉飲耆賓

王綏猷字允諧江南鳳陽籍崇禎中遷江夏賦性穎異久困舉場以子開泰封翰林院庶吉士生平正直不阿訓子弟循循有法度與人交然諾不欺遇戚里貧乏周給無德色足跡不履公庭焉

曹聖裔字漢嗣邑諸生行已廉潔慷慨好施戚黨賴之以經術世其家兩子接踵登科甲

方啟泰字定一天性孝友好善樂施鄉人德之目爲王彥方以子文瑞貴贈如其官

陳得名原籍豫章先朝遷江夏孝友謙抑康熙己未歲饑撫

江夏縣志

卷六

人物

美

軍張素知其賢委司賑務名倡捐助之當事以一鄉善士額旌其間年八十七卒

傅以貞庠生篤行好學戚黨稱之足不履城市嘗助修學宮柳公相字元臣廩生性慷慨遇人有急難多方拯救工詩者有望林投葉集

孫自獻性孝友多隱德年九十卒

葉帝春幼習儒遭獻賊難隱修德里邑有鬻子完逋者代償之

婁正詔字青州邑庠生慷慨好施邑有以重逋陷獄者數十人詔倡捐募貲代償之

李偉茂湘東里民世務本業同居八世鬪家百餘口偉茂以食指太繁令各爨婦女饁餉田閒相遇垂涕不忍舍因復合爲一孝友媿睦之風不愧張公鄭氏云

張應聘字象賢性慷慨歲饑戚族多賴以舉火里中張某幼孤豪奪其產力庇之卒令復業嘗夜遇盜聞其名相與驚顧送之歸子以修亦好施館穀所人悉濟貧乏孫若衡康熙丙戌進士任雅州知府

汪振繩字齊至紹遠次子隨父任以安陸學充歲貢紹遠陞任湖南九谿衛教授至湖口病不起振繩哀毀盡禮及歸倡修學宮並縣志江邑舊撥府學四名振繩邀紳士公呈准增

撥三名著爲定例雍正閒江西巡撫汪滢欲保薦振繩以母老力辭時胞兄振展出繼傅姓遂讓請改薦展展歷官兗州運河同知子女九人皆振繩爲畢婚嫁卒年八十二子本舉人任棗陽教諭彬歲貢任應城訓導桂懋東棻俱庠生

汪源字泉達自徽遷居江夏棄儒業賈事母楊撫幼弟漢以孝友聞

張鴻文字際飛乾隆辛酉舉人敦孝友工詩文持身嚴正接物謙和郡守保延主講勺庭書院所得館穀輒分助及門之貧困者自處淡泊晏如也孫奎臨丙午優貢歷任廣濟荊州司訓與弟璧臨不析著不私財視孤姪如己出云

王一甯字元士才豐學贍篤志力行究心圖書之旨以歲貢
司訓蘄州集諸生講求實踐主講勺庭書院命遵白鹿洞約
刊朱子性理吟令學者日三復之與修縣志爲張石虹金會
公所推服著有邑志略太一山房古文集選楚國人文寶善
集楚風兩朝詩選行世

段而聘字儒珍附貢生燦子律己方正接人溫恭繼母夏性
過厲偕妻高兢惕奉之務得其歡心寡嫂袁氏無出偕婦事
之必謹授徒四十年多所成就著有竹塢偶錄殖學堂便筆
詩草

劉安諱字恭己篤學力行動遵矩矱終明經著有易經辨義

江夏縣志

卷六

人物

七

澹定居草從孫成善邑諸生父病嘗糞以孝聞

明東暘字如珏誠篤喜讀書不急名遇教子以義方戚黨有
急勉力周卹人或以昌後許之輒應曰爲人當如是非以徼
福也子懋紹貢生德紹乾隆辛丑進士

葉芝茂字恒九其先由江南宦楚遂占籍焉父萬春性嚴正
慷慨好施芝茂先意承志無不竭力承澍年十二以幼慧稱
乾隆丙午領鄉薦

楊祖齡號敬菴鄉貢生事繼母徐三十餘年曲體其志撫亡
兄子如已出立宗祠周貧乏年八十九卒著有適閒草行世
安鼎高字應昇天性孝友無疾言遽色少負異才不樂仕進

家素豐慷慨好施兄早逝撫姪如己子年逾七十猶健壯如少年忽一日靜坐若有所兆沐浴談孝而逝室中微聞異香鮑智盛世居西徑鄉天性純篤乾隆庚午歲歉出穀二百石賑饑又捐金四百兩建立祠堂集族歲時祭祀施棺埋骨篤行多類此子如契孫春藻壬子科同舉於鄉何敦六欲捐貲置義田未及行遺命諸子昌國昌桂昌祚卒成其志乾隆五十年歲大旱族中貧乏咸賴之李登一幼業儒有姊早寡兩甥俱幼登一棄書爲經營其產無所私泊甥成立悉以貲財付之

安瑄字次律弟瑒早卒遺子鼎和甫三歲瑄撫育甚至後鼎

江夏縣志

卷六

人物

七

和魁鄉薦作民牧有聲瑄年七十餘卒

秦正雄字長藩康熙己卯武舉性倜儻重氣節嘗領囊濟人緩急能左右射亦工韻語嘗登黃鶴樓有昔人到此曾招鶴今我登樓不問仙之句官宜都營千總攝守備事卒於官軍人懷之

段逢瑤字玉舟慷慨好義戊戌乙巳閒歲游饑捐貲爲食於路戊申水溢城中架木橋長數里以便行人往來

陳登疆字允鎮施惠不吝嘗於曹家嶺造石橋二乾隆戊戌饑出穀麥數百斛散給族黨乙巳旱復買米散給存活者眾卒年七十

程志瑣字萬鑑每歲暮必裹碎金攜周貧乏有孀姊僅一女
瑣爲女擇醜養姊數十年如一日

黃倫字君正子際久字恒徵世濟其善宅左爲通衢築隄建
石橋三行人利之愁霖積雪族不火者卽負橐食之其曾孫
文浩弱冠失恃侍父寢悱十年而後娶父逝苦出不入寢室
服闋猶時哭諸墓

鄭廷祥字庶安好義多善行廟嘴湖建橋築隄費數千金凡
三年始竣工盛漲時復設義渡置田爲經久計人稱庶安橋
吳柏字子壽居官山灣以力農起家行義好施近地偏災每
出穀濟饑手著義行家訓年九十六里人遂呼其地爲子壽

江夏縣志

卷六

人物

六

村子士俊庚午歲廢產以賙乏困年九十五

吳培采好義喜施居近有仙人湖渡其祖創置采計欲垂久
乃捐田以贍舟子往來稱便

查振聲任祁門知縣力行義事其祖爾偉父良理修橋設渡
如金口迴峯寺古通橋禹觀山山門渡義渡團山頸要路及
老軍屯長隄振聲皆善繼述之子廣齡工四體書有石刻并
入楚帖孫培初亦克承先志焉

程聯槐字三台先世由徽州遷江夏五世同居子貢生雲炳
捐田三十三石爲學宮修費書院膏火承父志也乾隆中以
孝友義行 旌官爲給銀建坊焉

葉仁忠字德基貢生力學敦行孝事庶母友愛諸弟好善樂施有負債不能償者焚其券

劉兆鳳字鳴岐饑年捐穀五百餘石助賑邑人德之

王貢南事祖母邢至孝年二十九而鰥已舉三子卽不復娶弟卒鞠弟之子如子嫁其女皆不遺餘力焉

湯上載號長嶺孝友慈愛雍正乾隆間兩值歲祲倡捐錢穀以賑貧苦卒年八十

桂維新國學生年饑捐穀於鄉多所存恤每除夕伺察貧困不舉火者暗投以金居瀕大江遇浮屍卽捐貲收瘞之

田之璠字葆光歲貢生侍父疾衣不解帶遇凶歲出穀百石

江夏縣志

卷六

人物

全

賑濟鄉里

朱才傑字若俊慷慨好施紓人急難乾隆甲申丁亥水災里中大饑傑推貸周卹全活無算年八十四

王學尙邑庠生兄弟皆早世撫姪成立五十年不析居

甘希賢勇於行義乾隆乙巳歲禮飯飢民數月全活者眾又捐銀五百助賑大吏予議敍不受身後妻李氏捐田三百畝爲邑人鄉會試場費成希賢志也咸豐十年中丞胡文忠公訪求遺行獎給惠周梓里匾額同治元年旌

李晉文嘗捐銀二千五百兩助賑

夏世瑾性孝友尤好義嘗捐千金賑飢子廣義亦嘗以數百

金輸公獲議敘

以上陳志

張燕翼字吉圃監生好善樂施歉歲自卹其族置義塾訓里中之子弟捐田給太平寺僧爲惜字會經久費

王瑋字友蘭幼孤母氏歐陽撫之成立兄弟俱疾廢瑋以筆耕養母兼養其兄弟始終不倦貧而能施戚友中有困乏者竭力周給其孝友睦恤根於天性鄉黨翕然稱之

劉應庚號隋亭邑增生族有鬻田廬者與之貲而返其券其生平慷慨大都類此

陳定泰郡庠生好善樂施至老不倦有借券數十紙悉命其孫焚之

江夏縣志

卷六

人物

三

陳芝監生性豪爽輕財仗義歉歲捐貲濟其族又稱貸於人以周鄰里寇亂之日奸民騷動首倡義分穀遠近效之得以保聚帖然

吳成祿以傭力養親兄早逝祿爲三弟娶妻生子謂吾有姪親有後矣遂終身不娶

胡仲高字厚峯少博洽通經史於周禮爾雅尤加邃密或勸就試舉則怡然不答從游者多所成就值歲饑爲粥食於路以差等爲施貸不少吝惜多利賴焉

胡元定監生其家雇工有盜銀者元定知之而不言第善遣之去其他解囊焚券人樂道其厚德焉

聶修洪與姪先已析居後姪窘困乃以己產割半與之歲歉煮粥救飢施棺掩暴無不勉爲者子澍霖亦克承父志焉田道三字行達嘗捐腴田租三百六十餘石錢一千貫入大觀書院條陳立案勒石爲同邑鄉會試賞又捐修金口隄路費銀二千餘兩乾隆五十三年大水煮粥以濟行旅鄉鄰貧乏尤多周給孫開藻道光丙午舉人咸豐十年中丞胡文忠公訪求遺行獎給丹桂培根匾額同治元年旌

劉惠傳性慷慨臨財不苟好善樂施粵逆犯楚惠傳倡團練以衛地方同治二年學使賈獎給古之良士匾額卒年八十閔大鑑夾山人妻陳氏事母氏吳均先意承志伯父效唐嗜

江夏縣志

卷六

人物

全三

酒而家貧曲爲奉養之叔大銘患酒疾親至省延名醫調湯藥三月愈堂兄弟六人爲付資數千金販木江南屢折屢助諸人議以房屋償卻不受離居三十里外有族叔祖母王氏年五十無依迎至家就養者十七年王病痢爲醫治陳煮藥滌穢無怨言卒具棺葬歲時祭奠之遠族孫士奇五世單傳奇少孤爲資生理授室置產里中舒仁安年四十無子代爲納妾生六子凡不能聘妻成戶者悉賴之學使王給匾曰孝義同敦

王霖字甘亭郡增生勵廉隅敦孝友家貧就張廉訪錢穀聘偶夢羣孩乞命晤告刑幕適襄陽有羣孩戲殺案因活數人

嘉慶初隨軍宜昌敍六品銜辭弗受賞日詩書正以立身功名其後也里黨稱之

韓有春字瓊芳性醇恪事父母以孝聞晨昏詣祖堂焚香再拜時物必薦而後食年節朔望敬禮有加生平言動遵古訓雖酷暑燕居未嘗去衣冠居塾蒙訓几席前隱有兩足跡焉曾使人市鹽多一包立命還之或謂舖工之誤歸鹽必遭斥遣遂以鹽分給丐者其耿介如此年八十七無疾卒

陳芳洛號涪溪孝友端方樂於爲善家貧藉筆耕餬口眞行篆隸一時爭購得資除自給外夏設茶湯冬墊道路歷數十年天門蔣丹林贈以楹帖設尊道路不言德乞米有書皆餽

江夏縣志

卷六

人物

舍

貧學使王獎以敦行不倦匾額年七十四卒

程于經字聚五四齡失怙稍長孝事孀母李氏遇戚中有子隨父至者輒垂涕母問權辭以對恐貽傷感十二歲母病侍湯藥衣不解帶者月餘獲瘳及居母喪茹淡齋三年每日必祭塋號泣而往晚年課孫曾幼讀至內則諸篇猶悲咽竟日以未獲生養爲恨

戴嶠字雪坪立品端方教授生徒文章經史外凡存心修身處世之道悉以謙字爲訓常自勵曰不作懸空想常懷抱歉心舉乾隆壬子優貢授孝感司訓甫一年卒

趙遇望字觀山監生少孤事母汪孝年甫十三母病醫議服

麥芬母以價昂不敢請於舅姑望日袖小孟私製以進彌月
痊有姊適朱貧寡子幼予五百金俾食其利增修家祠爲捐
祀產族戚告貸必應塾師自修脯外厚爲饋遺里中寒峻多
藉資助除夕尤厚

徐堦號華亭乾隆辛卯舉人沔陽州學正淹通經史教人以
德行道藝爲先務從游者多列膠庠時有徐陶汪魏江夏四
家之目居官廉潔貽子孫惟書滿篋而已

張德潤號誠齋家素貧教讀八角嶺保壇寺有譚洲婦攜小
兒拾麥被茶姬誘至舟中乘夜逃登岸抵寺求宿潤留婦已
與僧外出局寺門尋獲其兒併送歸不受謝孤老李某依寺

江夏縣志

卷六

人物

五

行乞及病潤力爲調養死瘞埋之其授徒不計束修課子姪
極嚴家雖窘誦讀無閒

易方孟樂善好施不喜置生產有餘則買棺槨紙錢以殮葬
沒而無依者身死而子孫申落人咸惜之

楊錦泰字次伯樸誠行善兄弟分爨以薄產自給族子弟無
力讀者出修金膏火婚嫁喪葬無資及凶歲不能舉火者常
周給不責償長嶺山麓沙子港爲往來通衢捐金督修石橋
行人便之以孫華魁贈武略騎尉子監生銜東亦好義輕財
王如鵬字萬侯好儒術尤重義輕財嘗捐貲建獅子橋小橋
閔家橋行旅德之

傅夢麟號玉屏邑庠生慷慨好義乾隆乙巳歲荒捐五百金濟族黨丙午春疫凡貧苦者必親視之

張應渭字特清樂施予鄰里族黨皆恃爲緩急每年家出穀千餘石照時值減價百文又於里中修廟建橋計捐銀數千兩乾隆五十年倡建宗祠遇紛難排解輒自出貲寢事不計償子德夏德周亦善體父志道光辛卯大水捐穀百餘石賑濟家族咸賴之

倪元弼字治安監生性純篤好善年八十無疾卒

倪承相字佐皇幼事父母以孝著族中乞貸者無難色不能償聽之里中或因利構難輒解囊委曲息訟至葺廟修橋或

江夏縣志

卷六

人物

六

捐貲或領袖均玉成之年六十二始生子越三年卒

鄒才方鹽坊堡人能事父母以農爲業佃人之田而歲納租無少吝妻葉氏於其故後仍爲人佃雖老而窮苦納租未清不敢自食也才方刑於其妻而能守之於身後賢已哉亟傳之以爲鄉里風

祝景富三城二里人性端厚敬宗收族輕財重義咸豐中粵寇竄楚蹂躪四鄉景富率族眾立團練以衛地方有公輸必首捐之以爲倡近復邀集同人出貲行育嬰恤孤諸善事遠近賴之壽七十九卒

○武功

漢

馬武南陽湖陽人少時避讐客居江夏王莽末竟陵西陽三

老起兵於郡界武往從之後從世祖擊賊拜捕虜將軍楊虛

侯

一統志按舊志武勳作拜振威將軍騎都尉

馬震馬武之孫以功封濇亭侯

三國魏

李通封建功侯

明

張必達大總戎

黃彬從歐普祥納款明太祖同普祥守袁州扼其要言陳友

江夏縣志

卷六

人物

全七

諒潭岳贛兵不得出勢太蹙太祖兵臨之遂棄江州彬力也

太祖以為江西行省參政普祥故殘暴及死彬領其眾盡反

所為民甚安之後降熊天瑞招集諸山寨江西遂定進江淮

行省中書左丞洪武三年封宜春侯歲祿九百石予世券平

上猶山寇古州洞蠻賜第中都後坐胡惟庸黨爵除

張尙忠以知府擢定遠將軍

張安安鄉伯

張榮忻城伯

張昶彭城伯

安勝本江南定遠人元末團結鄉勇歸附和陽王隨征采石

及陳也先屢著戰功洪武二年封武昌中護衛正千戶世職
洪武十五年安長生襲職隨楚王就藩武昌遂居江夏今子
孫掇科第登仕版爲邑望族

安大朝襲千戶嘉靖三十五年平倭功陞南京後軍都督總
兵

佟養真奉天人移籍江夏精韜略嫻技勇爲開原參將曾陷
重圍突出後贈鎮國將軍都指揮同知祀鄉賢

國朝

常正綱字公振原居孟縣祖子厚遷鄂父應爲荊州營驍騎
尉早卒正綱年十五康熙九年隨湖廣總督蔡征雲南詢知

江夏縣志

卷六

人物

全

爲開平王後子參領職銜都督諒有材督攻辰龍關遇害綱
匿喪督兵攀藤先登斷敵要害眾兵進勦遂成大功軍中猶
以爲諒都督也議功授都督僉事借補柴溝堡守備嗣丁母
憂回籍值裁兵夏逆亂聚家丁義民三百餘人預伏蔡家溝
擒殺數十人起復授武岡營遊擊雍正癸卯奉檄辦理征阿
爾特誕兵卒洞庭舟次子三長春次景又次紹爽奉

恩旨俱著効力宗人府

崔相國字元卿父彥倫官承信尉先世中州人奉調至楚從
征西山賊卒於軍相國求父屍五年不獲遂籍江夏康熙初
隨大將軍平吳逆授都督僉事任浙江温州總兵康熙丁亥

聖駕南巡

問征吳事名對稱

旨賜迎恩堂匾額陞都督同知鎮臺灣調處州總兵時三營新設兵丁俱係各營調撥家室未安因捐積俸數千金為移家成業兵丁感悅

孫鼎銓字簡可以將材授雲南廣南游擊所轄地患煙瘴力禱得雪嵐瘴為消致叛逆韋登科向化軍民以神君誦之又因邊彝失教會郡守詳題建學進文武生員如額時有儒將之稱以巡邊道卒

管鳳儀字九成先世有官總鎮者儀以軍功任夔州營都司

江夏縣志

卷六

人物

完

操練軍士無時少懈然愛之如子體恤備至子國泰廣西參將

○隱淪

漢

馬廖字文起父為北地太守永初四年坐羌事下獄死廖感父以法喪身憚為吏嘆曰老子有言名與身孰親吾豈為名乎遂絕志世外教授鄉里尤明天人風角之術避召不往時號北郭先生年八十終於家

潘志作沙羨人

晉

李廡字宗子祖康秦州刺史父重平陽太守世有名望廡好

學善草隸與兄式齊名。躄疾不能行，坐嘗仰臥彈琴誦讀，不輟。河閒王辟太尉掾，以疾不赴。後避難隨兄南渡，司徒王導辟之，廡曰茂宏，乃復以一爵假人。廡嘗爲二府辟，故號李府。

潘志作江夏鍾武人

張公名未詳，相傳張公洲，其所隱居也。

宋

李昌國善教子，長子康侯，河陽府次康年，監丞善古，篆與蘇軾黃庭堅游。次康直左司員外郎，休官歸里，自稱裕老。

桂淦自稱漢陰老人，居水濱，戴笠躬耕，嘗曰：仕者忍恥耕者

勞力皆大造之，委蛻耳吾何心哉。

潘志作杜淦

江夏縣志

卷六

人物

九

胡叔居家蒿室，草徑唯酒，自適嘗謂人曰：我此生活似勝焦光，不治生產，饑貧不以爲恥。養子卽呼曰螟蛉，恒乘一犂牛，布囊容三四升，飲噉醉飽，便盛所餘以付螟蛉。

明

吳徹字文通，雅善吟咏，家貧落魄，好奇節。元末天下亂，爲陳友諒所得，置諸親密，呼爲先生。歲壬寅，友諒進攻豫章，遣徹微行覘探，爲明太祖所獲，親釋其縛，問曰：汝能詩爲我賦。天閑百馬圖，徹應聲曰：問君何日渡江來，百騎如雲畫鼓催。九十九中皆汗血，當頭一箇是龍媒。太祖擊節不忍殺，又度其終不爲用，欲以戲友諒，乃刺詭譎秀才四字於面，遣還友

諒惡之曰安有如此形容而可爲我先生者乎徹遂掉小舟
遞去後友諒敗死次子陳理奔還武昌守堅城久不下太祖
怒將屠城忽有稱詭譎秀才求見者召入問曰汝安得尙在
此良久復命題西山夜雨詩徹復應聲曰莫厭西山夜雨多
也應添起洞庭波東風肯與周郎便直上金陵奏凱歌太祖
遂下令班師還建康後屢下詔物色之徹竟辭不出曰吾面
目可憎

李萃然字仁夫工詩精六書故與大學士張治善張雅欲用
之特造其門覩壁閒詩有曰文章自古有定價用舍一時無
定名張爲憮然

江夏縣志

卷六

人物

左

朱華園字淮仙楚宗藩中尉英照次子六歲就外傳卽舉大
學二字問師曰此何等學也師奇之十四通古今不屑就試
二十好新建之學及周程朱陸諸書會通一貫之旨尤喜著
述有滙書宋元詩選暨梅湖桃溪諸集晚更爲一書曰聖賢
寶鑑論列聖賢發揚忠佞五十萬言崇禎癸未三月夢遊石
壁見有詩云飛泉如白鶴隱見渡平林暗壁流花瓣漁郎何
處尋隨告親友曰時危矣去之可也卽棄家遞入桃谿不知
所終

燕遺民字逸德號空空老人累以賢良徵不赴翛然獨往深
山絕壁或臨水濱嘯歌終日嘗作感興詩云寥落湖山曲憑

誰話起居出門唯山水相見但樵漁酒熟還堪漉葵荒欲自
鉏久深泉石想早晚賦歸與又云泉谷煙火靜林塘暑氣清
幽花籬落見好鳥竹閒鳴禾黍皆豐稔桑麻自長成遠聞茅
屋裏燈火讀書聲

張鍾靈字一卿其先武昌人後徙江夏中宏治戊午解元隨
晦跡家塾脫然聲華之外終身不仕

方一清字汝登號愛溪嘉靖癸卯舉人任知縣致仕歸隱爲
雲林隱社之一

沈韻字四聲家世業儒兄弟四人韻居次早孤補弟子員淡
於進取左轄南徐王公冀偶閱韻西湖詩雅好之延至幕中

江夏縣志

卷六

人物

五

楚城陷韻母弟家屬次第淪沒乃隨王公遨遊吳越釣臺虎
邱五湖匡廬之勝皆窮搜之久乃歸楚營葬母氏畢卽廢棄
諸生業隱梁湖之孤山偕妻鉏圃賣藥自給嘗采蔬於蕪有
士者奮臂相加笑謝之樵於山初不習運斤傷左肘臥數日
不起邨人皆笑之久咸敬愛呼爲沈秀才閒持雞相造請論
古和歌晝則分羹爲餐夜則借邨人之箕薄以蔽風露因自
號蓑菴處士足不履市者二十年卒年五十有二韻工書畫
尤喜爲詩頗多散佚邑人王一甯收其遺稿付之剞劂焉
趙金節字友松九歲失父嘗做笈羸馬走吳越燕趙聞願憲
成延入太學作序贈之懷宗季忽遯跡巖谷鄂城破不踐其

難晚乃殫心性命之學學使郜公援招隱例屢徵不報年七十有九以遺藁付其子三學三緘曰吾歸矣當葬吾以皇甫謐楊王孫之例

艾然字然明一字木田弱冠補弟子員卽淡於進取詩酒自豪所居東門外築圃蒔花諸王孫多從之遊懷宗癸未城陷挈妻子走避鹿泉山拾野蔬自給後妻死益自放順治初年乃返東郭結茅舊址手種桃梅花果而題其居曰萬木園署其門曰賣花沽酒讀書務覽大概不求甚解以意自作春王正月辨及周易疏一空勦說性孤戇視塵俗如廁見非禮事輒髮豎背裂聞其譏彈者每用爲韋弦晚年氣稍平易署其齋曰待盡菴年七十有三卒蓋古之逸民也

江夏縣志

卷六

人物

叁

國朝

周家鼎字峙鉉其先大治人中崇禎己卯舉人癸未獻賊陷城鼎奉父母竄伏湖濱父歿乃築室梅城題其門曰知止與母偕隱因自號曰梅城順治己丑歲當會試臺司敦促不獲已就公車入闈迅筆疾書卽交卷出分考金某得卷亟賞曰如此高篇何以七結俱無遂置之榜是時乙榜有選用中書例捷音至里門其母曰吾兒志不忍離膝下圖溫飽乃以捧檄勞我倚門乎越數日鼎果旋自是杜門不出潛心學道閒聚里中素封者困積以備荒倣常平義倉之法條其可行爲

一書致之當事嘗效涑水洛下聯爲真率會而性磊落不畱
心家人生業屢致窘乏丙辰楚大饑大司馬張朝珍欲令官
司及紳士俱輸粟助賑雅不欲以官吏擾民乃屬鼎鼎曰此
固吾願吾前亦行之里中於是殫經畫全活不下億萬計晚
年喜著書尤念邑先賢吳裕中能廷弼賀逢聖信史未立各
爲傳以表之又任修文廟之役先是二丁祭外諸生白首有
不知

先師誕辰者乃率兩庠子弟卽八月二十七日舉慶禮自是
歲以爲常其居母喪不御酒肉者三載所著有家禮議宜及
易詩貞通諸解學者稱梅城先生

江夏縣志

卷六

人物

九

魏廷謨字溟一明諸生也高才博學性恬澹絕意仕進好讀
書年九十猶事箋註手不釋卷生平平易欵曲不立崖岸至
大節所繫凜凜乎繩尺不踰前輩鍾惺譚元春皆引重之
王師字淑餘邑名諸生也隱處湖山不求仕進精字學得魯
公筆法浙江總制趙廷臣聞其名禮爲上賓師終不合而去
蔡其煥字兩淑明府學廩生也性恬澹不悅仕進精於易理
尤究心濂洛關閩之學閉戶著述扁其門曰澹園弟其焯邑
諸生亦潛心理學明末隱居馬鞍山著有大易補註兵燹散
失

楊懋官字德懋賦質聰穎博洽羣書爲文古雅秀逸性端介

年十五列府庠中天啟丁卯副榜授河南嵩縣教諭甲申之
變棄官歸隱晚年以輿圖自隨按圖遊歷所至歛獻憑弔多
所撰述著有三經畧古今文畧史觀掌全騷注莊畧學庸說
等書燬於兵

余注字明福性介直不阿爲郡諸生後棄舉子業隱湘東之
青山黃冠野服躬耕自給著周易刪補自號拙菴

徐封魏字青芝食餼縣庠以禮記中崇禎壬午科乙榜國變
遯跡北門山居惟著書講學所著有禮記明述行世

任之奎字次璧十歲擅文譽壬戌歲薦廷試歸小圃短徑誅
茅構宇作斗室一區自比康節安樂窩吳升東侍御贈以詩

江夏縣志

卷六

人物

奎

云文章垂老功偏篤出處安貧道更堅蓋實錄也

容朝周字中含邑諸生性孝友兄弟六人白首相友愛澹於
仕進寄情詩酒與同邑龐載孫明滋洪石礪相唱酬著有石
山小草藏於家

李居上字尊之生而穎異弱冠工舉子業賊變城陷怙恃俱
失涕泣哀慕有勸進取者曰人生奮志雄飛期榮親耳吾親
見背卽殊遇何益待弟甘苦與共處鄉黨和氣益溢無貴賤
老幼一待以坦易至誠壽八十七而終子廷謨庚辰進士

秦文樸字訥夫城東北隅老布衣也不求聞達而隱於詩嘗
一游江南訪杜茶村墓而夢與之言精誠相通故古人可接

也王菊門記其事於變雅堂集後子訪其居子孫以種花爲業環堵蕭然庭戶整潔猶可想見隱君子之餘風問其著述則亂後無存唯遺詩一卷樸而不雕質而不俚陶五柳之流也